

金史

冊
三

金史卷七十八

元大中書右丞相總裁脫脫等修

天列傳第十六

劉彥宗

劉萼

劉箬

劉仲誨

劉頰

時立愛

韓企先

子鐸

劉彥宗字魯開大興宛平人遠祖怛唐盧龍節度使石晉以幽薊入遼劉氏六

世仕遼相繼為宰相父霄至中京留守彥宗擢進士乙科天祚走天德秦晉國

王耶律雅里自立于燕擢彥宗留守判官蕭妃攝政遷簽書樞密院事太祖至

居庸關蕭妃自古北口遯去都監高六送款于太祖太祖奄至駐蹕城南彥宗

與左企弓等奉表降太祖一見器遇之俾復舊遷左僕射佩金牌張覺為南京

留守太祖聞覺有異志使彥宗斜鉢宣慰之太祖至鴛鴦灤不豫還上京留宗

翰都統軍事留彥宗佐之及張覺敗奔于宋眾推張敦固為都統殺使者乘城

拒守攻之不肯下彥宗同中書門下平章事知樞密院事加侍中佐宗望軍宗

望奏方圖攻取凡州縣之事委彥宗裁決之天會二年詔彥宗曰中京等兩路先多拒命故遣使撫諭貰其官民之罪所犯在降附前者勿論卿等選官與使者往諭之使勤于稼穡未幾大舉伐宋彥宗畫十策詔彥宗兼領漢軍都統蔡靖以燕山降詔彥宗凡燕京一品以下官皆承制注授遂進兵伐宋至汴宋少帝割地納質師還宗望分將士屯安肅雄霸廣信之境留闍母彥宗于燕京節制諸軍明年再伐宋已圍汴京彥宗謂宗翰宗望曰蕭何入關秋毫無犯惟收圖籍遼太宗入汴載路車法服石經以歸皆令則也二帥嘉納之執二帝以歸天會六年薨年五十三追封鄆王正隆二年例降封開府儀同三司大定十五年追封兗國公諡英敏子萼筭

萼彥宗季子也遼末以蔭補閣門祗候天輔七年授禮賓使累官德州防禦使天德初稍加擢用歷左右宣徽使拜參知政事進尙書左丞爲沁南軍節度使歷臨洮太原尹正隆南伐爲漢南道行營兵馬都統制大定初除興中尹封任國公歷順天定武軍節度使濟南尹萼淫縱無行所至貪墨狼籍廉使劾之詔

遣大理少卿張九思就濟南鞠問既就逮不測所以引刃自殺不死詔削官一階罷歸田里卒子仲詢天德三年賜王彥潛榜及第宋留中彥潛王彥潛王彥潛及第彥宗次子幼時以廢隸閣門不就去從學遼末調兵而筭在選中遼兵敗左右多散亡乃選筭爲扈從授左承制遼主西奔蕭妃攝政賜筭進士第授尙書左司員外郎寄班閣門天輔七年太祖取燕筭從其父兄出降遷尙書左司郎中八年授殿中少監太祖崩宋夏遣使弔慰凡館見禮儀皆筭詳定遷衛尉少卿授西上閣門使仍從事元帥府元帥府以便宜從事凡約束廢置及四方號令多從筭之畫焉天會二年遷太常少卿東上閣門使從宗翰伐宋圍太原遷衛尉卿權簽宣徽院事四年授左諫議大夫秋復南征權中書省樞密院事丁父憂明年起復直樞密院事加給事中七年爲禮部侍郎十年改彰信軍節度使權簽中書省樞密院事天眷二年改左宣徽使熙宗幸燕法駕儀仗筭討論者爲多皇統元年充江南封冊使假中書侍郎既至臨安而宋人榜其居曰行宮筭曰未受命而名行宮非也請去榜而後行禮宋人驚服其有識欲厚賄說

之奉金珠三十餘萬而箬不之顧皆歎曰大國有人焉五年爲行臺尙書右丞相兼判左宣徽使事留京師或請釐革河南官吏之濫雜者箬曰廢齊用兵江表求一切近効其所用人不必皆以章程故有不由科目而爲大吏不試弓馬而握兵柄者今撫定未久姑收人心奈何爲是紛更也遂仍其舊七年帥府議於館陶築三城以爲有警卽令北軍入居之箬曰今天下一家孰爲南北設或有變軍人入城獨能安耶當嚴武備以察姦無示彼此之間也其後竟從箬議初以河外三州賜夏人或言秦之在夏者數千人皆願來歸諸將請約之箬曰三小州不足爲輕重恐失朝廷大信且秦人之在蜀者倍多於此何獨捨彼而取此乎遂從箬議陝西邊帥請完沿邊城郭以備南寇箬曰我利車騎而不利城守今城之則勞民而結怨况盟已定豈可妄動遂罷之九年八月拜司空九月拜平章政事封吳國公行臺右丞相如故天德元年封滕王二年拜尙書右丞相兼中書令進封鄭王未幾以疾求解政務授燕京留守進封曹王居數月乞致仕箬自爲宣徽使以能得悼后意致位宰相海陵卽位意頗鄙之及箬求

致仕詔略曰不爲暗於臨事不爲詔於事君未許告歸姑從解職筭因慚懼而死年五十八子仲誨

仲誨字子忠皇統初以宰相子授忠勇校尉九年賜進士第除應奉翰林文字海陵嚴暴臣下應對多失次嘗以時政訪問在朝官仲誨從容敷奏無懼色海陵稱賞之貞元初丁父憂起復翰林修撰大定二年遷待制尋兼修起居注左補闕三年詔仲誨與左司員外郎蒲察蒲速越廉問所過州縣仲誨等還奏狀詔玉田縣令李方進一階順州知法權密雲縣事王宗永擢密雲縣尉順州司候張璘密雲縣尉石抹烏者皆免去丁母憂起復太子右諭德遷翰林直學士改棣州防禦使馱次縣捕得強盜數十人詣州欲以全獲希賞仲誨疑其有冤緩其獄同僚曰縣境多盜請寘之法以懲其餘仲誨乃擇老穉者先釋之未幾乃獲真盜入爲禮部侍郎兼左諭德遷太子詹事兼左諫議大夫上曰東宮官屬尤當選用正人如行檢不修及不稱位者具以名聞又曰東宮講書或論議間當以孝儉德行正身之事告之頃之東宮請增牧人及張設什用上謂仲誨

曰太子生於富貴每教之恭儉朕服御未嘗妄有增益卿以此意諭之改御史中丞十四年爲宋國歲元使宋主欲變親起接書之儀遣館伴王抃來議曲辨強說欲要以必從仲誨曰使臣奉命遠來修好固欲成禮而信約所載非使臣輒敢變更公等宋國腹心毋僥倖一時失大國歡往復再三竟用舊儀親起接書成禮而還復爲太子詹事遷吏部尙書轉太子少師兼御史中丞坐失糾舉大長公主事與侍御史李瑜各削一階仲誨前後爲東宮官且十五年多進規戒顯宗特加禮敬大定十九年卒仲誨立朝峻整容色莊重世宗嘗曰朕見劉仲誨嘗若將切諫者其以剛嚴見知如此

頰字元矩以大臣子孫充閣門祇候調莘縣令召爲承奉班都知遷西上閣門副使兼宮苑令累遷西上東上閣門使泰和二年宋盱眙軍報明年賀正旦使魯館楊明輝及過界副使乃王處久入見魯館殿上不雙跪詔頰就閣詰問先報名銜楊明輝不復報改王處久之故及不雙跪者魯館對拜時並雙跪有足疾似單跪者初南苑有唐舊碑書貞元十年御史大夫劉怱葬上見之曰苑中

不宜有墓頰家本怙後詔賜頰錢三百貫改葬之三遷右宣徽使貞祐二年轉左宣徽使明年致仕遷一官上曰卿舊人也今朝廷多故豈宜去位朕自東宮薨後思慮不周俟稍寧息卽以上郡處卿頃之起爲知開封府四年正月元日攝左宣徽使再請老未半歲復起爲御史中丞詔安撫河南路捕盜賊坐與保靜軍節度使會飲解職起爲太子詹事遷太子少師詹事院欲闢廣東宮周牆頰請於皇太子曰師旅饑饉之際何爲與此役遂止尋卒

時立愛字昌壽涿州新城人父承謙以財雄鄉里歲饑發倉廩賑貧乏假貸者與之折券遼太康九年中進士第調泰州幕官丁父憂服除調同知春州事未逾年遷雲內縣令再除文德令樞密院選爲吏房副都承旨轉都承旨累遷御史中丞剛正敢言忤權貴除燕京副留守丁母憂起復舊職遷遼興軍節度使兼漢軍都統太祖已定燕京訪求得平州人韓詢持詔招諭平州是時奚王回鹘保在盧龍嶺立愛未敢卽朝見先使人來送款曰民情愚執不卽順從願降寬恩以慰反側詔曰朕親巡西土底定全燕號令所加城邑皆下爰嘉忠款特

示優恩應在彼大小官員可皆充舊職諸囚禁配隸並從釋免於是遼帝尙在天德平州雖降民心未固奚王回离保軍所在保聚薊州已降復叛民間流言謂金人所下城邑始則存撫後則俘掠時立愛雖開諭而不肯信乃上表乞下明詔遣官分行郡邑宣諭德義他日兵臨于宋順則撫之逆則討之兵不勞而天下定矣上覽表嘉之詔答曰卿始率吏民歸附復條利害悉合朕意嘉歎不忘山西部族緣遼主未獲恐陰相連結故遷處于嶺東西京人民旣無異望皆按堵如故或有將卒貪悍冒犯紀律輒掠降人者已諭諸部及軍帥約束兵士秋毫有犯必刑無赦今遣幹號阿里等爲卿副貳以撫斯民其告諭所部使知朕意其後以平州爲南京用張覺爲留守時立愛遂去平州而張覺遂因燕京人東徙其衆怨望覺遂叛入于宋立愛旣去平州歸鄉里太祖以燕薊與宋新城入于宋宋累詔立愛立愛見宋政日壞不肯起戒其宗族不得求仕及宗望再取燕山立愛詣幕府上謁拜同中書門下平章事任其子姪數人立愛從宗望軍數年謀畫居多封陳國公表求解機務不從九年爲侍中知樞密院事久

之加中書令天會十五年致仕加開府儀同三司鄭國公薨于家年八十二賻贈錢布繒帛有差詔同簽書燕京樞密院事趙慶襲護喪事葬用皆官給之韓企先燕京人九世祖知古仕遼爲中書令徙居柳城世貴顯乾統間企先中進士第回翔不振都統杲定中京擢樞密副都承旨稍遷轉運使宗翰爲都統經略山西表署西京留守天會六年劉彥宗薨企先代之同中書門下平章事知樞密院事七年遷尙書左僕射兼侍中封楚國公初太祖定燕京始用漢官宰相賞左企弓等置中書省樞密院于廣寧府而朝廷宰相自用女直官號太宗初年無所更改及張敦固伏誅移置中書樞密于平州蔡靖以燕山降移置燕京凡漢地選授調發租稅皆承制行之故自時立愛劉彥宗及企先輩官爲宰相其職大抵如此斜也宗幹當國勸太宗改女直舊制用漢官制度天會四年始定官制立尙書省以下諸司府寺十二年以企先爲尙書右丞相召至上京入見太宗甚驚異曰朕疇昔嘗夢此人今果見之於是方議禮制度損益舊章企先博通經史知前代故事或因或革咸取折衷企先爲相每欲爲官擇人

專以培植獎勵後進爲己責任推轂士類甄別人物一時臺省多君子彌縫闕漏密謨顯諫必咨於王宗翰宗幹雅敬重之世稱賢相焉皇統元年封濮王六年薨年六十五正隆二年例降封齊國公大定八年配享太宗廟庭十年司空李德固孫引慶求襲其祖猛安世宗曰德固無功其猛安且闕之漢人宰相惟韓企先最賢他不及也十一年將圖功臣像于衍慶宮上曰丞相企先本朝典章制度多出斯人之手至於關決大政與大臣謀議不使外人知之由是無人能知其功前後漢人宰相無能及者置功臣畫像中亦足以示勸後人十五年謚簡懿

韓鐸字振安企先次子也皇統末以大臣子授武義將軍熙宗聞其有儒學賜進士第除宣徽判官再遷刑部員外郎海陵遣中使諭之曰郎官高選也汝勳賢之子行己蒞官能世其家故以命汝苟能夙夜在公當不次擢用雖公相可到鐸感奮獄或有疑據經議讞海陵伐宋改兵部員外郎大定初遷本部郎中累官河州防禦使求養親解去召爲左諫議大夫遷中都路都轉運使頃之上

謂宰臣曰韓鐸年高不任繁劇且其母老矣可與之便郡於是改順天軍節度使卒

贊曰太祖入燕始用遼南北面官僚制度是故劉彥宗時立愛規爲施設不見于朝廷之上軍旅之暇治官政庀民事務農積穀內供京師外給轉餉此其功也韓企先入相兩朝幾二十年成功著業世宗稱其賢焉

金史卷七十八

金其於十八人之...

...

...

...

...

...

...

...

金史卷七十九

元中書右丞相宗總裁脫脫等修

列傳第十七

鄺瓊 李成 孔彥舟 徐文

施宜生 張中孚 張中彥 宇文虛中

王倫

鄺瓊字國寶相州臨漳人補州學生宋宣和間盜賊起瓊乃更學擊刺挽強試

弓馬隸宗澤軍駐于磁州未幾告歸括集義軍七百人復從澤澤署瓊為七百

人長澤死調戍滑州時宗望伐宋將渡河戍軍亂殺其統制趙世彥而推瓊為

主瓊因誘眾號為勤王行且收兵比渡淮有眾萬餘康王以為楚州安撫使淮

南東路兵馬鈐鐙累遷武泰軍承宣使未幾率所領步騎十餘萬附于齊授靜

難軍節度使知拱州齊國廢以為博州防禦使用廉遷驃騎上將軍宗弼復河

南以瓊為山東路弩手千戶知亳州事丁母憂去官宗弼再伐江南以瓊素知

南方山川險易召至軍與計事從容語同列曰瓊嘗從大軍南伐每見元帥國王親臨陣督戰矢石交集而王免胄指麾三軍意氣自若用兵制勝皆與孫吳合可謂命世雄材矣至於親冒鋒鏑進不避難將士視之孰敢愛死乎宜其所向無前日關國千里也江南諸帥才能不及中人每當出兵必身居數百里外謂之持重或督召軍旅易置將校僅以一介之士持虛文諭之謂之調發制敵決勝委之偏裨是以智者解體愚者喪師幸一小捷則露布飛馳增加俘級以爲己功斂怨將士縱或親臨亦必先遁而又國政不綱纔有微功已加厚賞或有大罪乃置而不誅不卽覆亡已爲天幸何能振起耶衆以爲確論元帥謂宗弼也及宗弼問瓊以江南成敗誰敢相拒者瓊曰江南軍勢怯弱皆敗亡之餘又無良帥何以禦我頗聞秦檜當國用事檜老儒所謂亡國之大夫兢兢自守惟顛覆是懼吾以大軍臨之彼之君臣方且心破膽裂將哀鳴不暇蓋傷弓之鳥可以虛弦下也旣而江南果稱臣宗弼喜瓊爲知言初瓊去毫未幾宋兵陷之而不守復棄去乃以州人宋超守之及大軍至超復以州事委其鈐鑿衛經

而遁去帥府使人招經經不下及城潰百姓惶懼待命瓊請於元帥曰城所不下者凶豎劫之也民何罪願慰安之元帥以瓊先嘗守亳因止戮經而釋其州人復命瓊守亳凡六年亳人德之遷武寧軍節度使八年爲泰寧軍節度使九年遷歸德尹貞元元年加金紫光祿大夫卒于官年五十九

李成字伯友雄州歸信人勇力絕倫能挽弓三百斤宋宣和初試弓手挽強異等累官淮南招捉使成乃聚衆爲盜鈔掠江南宋遣兵破之成遂歸齊累除知開德府從大軍伐宋齊廢再除安武軍節度使成在降附諸將中最勇驚號令甚嚴衆莫敢犯臨陣身先諸將士卒未食不先食有病者親視之不持雨具雖沾濕自如也有告成反者宗弼察其誣使成自治成杖而釋之其不校如此以此士樂爲用所至克捷宗弼再取河南宋李興據河南府成引軍入孟津興率衆薄城鼓譟請戰成不應日下昃興士卒倦且飢成開門急擊大破之興走漢南成遂取洛陽嵩汝等河南平宗弼奏成爲河南尹都管押本路兵馬嘗取官羨粟充公費坐奪兩官解職正隆間起爲真定尹封郡王例封濟國公卒年六

十九

孔彥舟字巨濟相州林慮人亡賴不事生產避罪之汴占籍軍中坐事繫獄說
守者解其縛乘夜踰城逸去已而殺人亡命爲盜宋靖康初應募累官京東西
路兵馬鈐轄聞大軍將至山東遂率所部劫殺居民燒廬舍掠財物渡河南去
宋人復招之以爲沿江招捉使彥舟暴橫不奉約束宋人將以兵執之彥舟走
之齊從劉麟伐宋爲行軍都統改行營左總管齊國廢累知淄州從宗弼取河
南克鄭州擒其守劉政破孟邦傑於登封授鄭州防禦使討平太行車轅嶺賊
從征江南渡淮破孫暉兵萬餘人下安豐霍丘及攻濠州以彥舟爲先鋒順流
薄城擒其水軍統制邵青遂克濠州師還累官工兵部尚書河南尹封廣平郡
王正隆例降金紫光祿大夫改南京留守彥舟荒于色有禽獸行妾生女姿麗
彥舟苦虐其母使自陳非己女遂納爲妾其官屬負官錢私其妻與折券惟破
濠州時諸軍凡係獲皆殺之彥舟號令毋輒殺免者數千人人頗以此稱之然
自幼至老常在行伍習兵事知利鈍海陵欲以爲征南將佐正隆五年除南京

留守彥舟有疾朝臣有傳彥舟死者而彥舟尙無恙海陵盡杖妄傳彥舟死者以激勵之無何竟死於汴年五十五遺表言伐宋當先取淮南云

徐文字彥武萊州掖縣人徙膠水少時販鹽爲業往來瀕海數州剛勇尙氣儕輩皆憚之宋季盜起募戰士爲密州板橋左十將勇力過人揮巨刀重五十斤所向無前人呼爲徐大刀後隸王龍圖麾下與夏人戰生擒一將補進武校尉東還破羣賊楊進等轉承信郎宋康王渡江召文爲樞密院准備將擒苗傅及韓世績以功遷淮東浙西沿海水軍都統制諸將忌其材勇是時李成孔彥舟皆歸齊宋人亦疑文有北歸志大將閻臯與文有隙因而譖之宋使統制朱師敏來襲文文乃率戰艦數十艘泛海歸于齊齊以文爲海密二州滄海都招捉使兼水軍統制遷海道副都統兼海道總管賜金帶文以策于劉豫欲自海道襲臨安豫不能用齊國廢元帥府承制以文爲南京步軍都虞候權馬步軍都指揮使天眷元年破太行賊梁小哥以本職兼水軍統制朝廷以河南與宋除文山東路兵馬鈐轄宗弼復取河南文破宋將李寶於濮陽孟邦傑於登封宋

蔣知軍據河陽文暉明至其城下使別將攻城東北自將精銳潛師襲南門城中悉衆救東北文乃自南門斬關入城宋軍潰去追擊敗之破郭清郭遠於汝州鄭州叛復取之擊走宋將戚方河南既平宗弼勞賞將士賞文銀幣鞍馬充行軍萬戶從宗弼取廬濠等州超換武義將軍知濟州在職七年移知泰安軍海陵卽位錄舊功累遷中都兵馬都指揮使賜金帶改濬州防禦使未幾海陵謀伐宋改行都水監監造戰船於通州東海縣人徐元張旺作亂縣人房真等三人走海州及走總管府上變州府皆遣使効隨真等詣東海觀賊形勢皆爲賊所害州府合兵攻之累月不下海陵且欲伐宋惡聞其事詔文與步軍指揮使張弘信同知大興尹李惟忠宿直將軍蕭阿宸率舟師九百浮海討之謂文等曰朕意不在一邑將以試舟師耳文等至東海與賊戰敗之斬首五千餘級獲徐元張旺餘衆請降是役也張弘信行至萊州稱疾留止日與妓樂飲酒海陵聞之師還杖弘信二百文遷定海軍節度使房真三人官賞有差死賊者皆贈官三級以銀百兩絹百匹賜其家大定二年詣闕自陳年老目昏懇求致仕

許之以覃恩遷龍虎衛上將軍卒于家

施宜生字明望邵武人也博聞強記未冠由鄉貢入太學宋政和四年擢上舍第試學官授潁州教授及王師入汴宜生走江南復以罪北走齊上書陳取宋之策齊以爲大總管府議事官失意於劉麟左遷彰信軍節度判官齊國廢擢爲太常博士遷殿中侍御史轉尙書吏部員外郎爲本部郎中尋改禮部出爲隰州刺史天德二年用參知政事張浩薦宜生可備顧問海陵召爲翰林直學士撰太師梁王宗弼墓銘進官兩階正隆元年出知深州召爲尙書禮部侍郎遷翰林侍講學士四年冬爲宋國正旦使宜生自以得罪北走恥見宋人力辭不許宋命張燾館之都亭因問以首丘風之宜生顧其介不在旁爲廋語曰今日北風甚勁又取几間筆扣之曰筆來筆來於是宋始警其副使耶律闢離刺使還以聞坐是烹死初宜生困於場屋遇僧善風鑿謂之曰子面有權骨可公可卿而視子身之毛皆逆上且覆腕必有以合乎此而後可貴也宜生聞其言大喜竟從范汝爲於建劍已而汝爲敗變服爲傭泰之吳翁家三年翁異之一

日屏人詰其姓名宜生曰我服傭事惟謹主人乃亦寘疑邪翁固詰之則請其故翁曰日者燕客執事咸餒而汝獨孫諸儕且撒器有歎聲是以識汝非真傭也宜生遂告之故翁贖之金夜濟淮以歸試一日獲熊三十六賦擢第一其後竟如僧言

張中孚字信甫其先自安定徙居張義堡父達仕宋至太師封慶國公中孚以父任補承節郎宗翰圍太原其父戰歿中孚泣涕請迹父屍乃獨率步曲十餘人入大軍中竟得其屍以還累官知鎮戎軍兼安撫使屢從吳玠張浚以兵拒大軍浚走巴蜀中孚權帥事天會九年睿宗以左副元帥次涇州中孚率其將吏來降睿宗以爲鎮洮軍節度使知渭州兼涇原路經略安撫使齊國建以什一法括民田籍丁壯爲鄉軍中孚以爲涇原地瘠無良田且保甲之法行之已習今遽紛更人必逃徙祗見其害未見其利也竟執不行時齊政甚急莫敢違人爲中孚懼而中孚不之顧未幾齊國廢一路獨免培克之患天眷初爲陝西諸路節制使知京北府朝廷賜地江南中孚遂入宋宗弼再定河南陝西移文

宋人使歸中孚至汴就除行臺兵部尙書遷除參知行臺尙書省事明年拜參知政事貞元元年遷尙書左丞封南陽郡王三年以疾告老乃爲濟南尹加開府儀同三司封宿王移南京留守又進封崇王卒年五十九加贈鄧王中孚天性孝友剛毅與弟中彥居未嘗有間言喜讀書頗能書翰其御士卒嚴而有恩西人尤畏愛之葬之日老穉扶柩流涕蓋數萬人至爲罷市其得西人之望如此正隆例封崇進原國公

張中彥字才甫中孚弟少以父任仕宋爲涇原副將知德順軍事睿宗經略陝西中彥降除招撫使從下熙河階成州授彰武軍承宣使爲本路兵馬鈐轄遷都總管宋將關師古圍鞏州與秦鳳李彥琦會兵攻之王師下饒風關得金洋諸州以中彥領興元尹撫輯新附師還代彥琦爲秦鳳經略使秦州當要衝而城不可守中彥徙治北山因險爲壘今秦州是也築臘家諸城以扼蜀道帥秦凡十年改涇原路經略使知平涼府朝廷以河南陝西賜宋中孚以官守隨例當留關中熙河經略使慕洵謀入夏將闕關陝中彥與環慶趙彬會兩路兵討

之洧敗入于夏中彥與兄中孚俱至臨安被留以爲龍神衛四廂都指揮使清遠軍承宣使提舉佑神觀靖海軍節度使皇統初恢復河南詔徵中彥兄弟北歸爲靜難軍節度使歷彰化軍鳳翔尹改尹慶陽兼慶原路兵馬都總管寧州刺史宗室宗淵毆死僚佐梁郁郁遠人家貧無能赴告者中彥力爲正其罪竟寘于法改彰德軍節度使均賦調法姦豪無所蔽匿人服其明正隆營汴京新宮中彥採運關中材木青峯山巨木最多而高深阻絕唐宋以來不能致中彥使構崖駕壑起長橋十數里以車運木若行平地開六盤山水洛之路遂通汴梁明年作河上浮梁復領其役舟之始製匠者未得其法中彥手製小舟纔數寸許不假膠漆而首尾自相鉤帶謂之鼓子卯諸匠無不駭服其智巧如此浮梁巨艦畢功將發旁郡民曳之就水中彥召役夫數十人治地勢順下傾瀉于河取新秫稽密布於地復以大木限其旁凌晨督衆乘霜滑曳之殊不勞力而致諸水俄遷平陽海陵將伐宋驛召赴闕授西蜀道行營副都統制賜細鎧使先取散關俟後命世宗卽位赦書至鳳翔諸將惶惑不能決去就中彥曉譬之

諸將感悟受詔上召中彥入朝以軍付統軍合喜及見上賜以所御通犀帶封宗國公尋爲吏部尙書上疏曰古者關市譏而不征今使掌關市者征而不譏苛留行旅至披剔囊箚甚於剽掠有傷國體乞禁止從之踰年除南京留守時淮楚用兵士民與戍兵雜居訟牒紛緒所司皆依違不決中彥得戍兵爲盜者悉論如法帥府怒其專決劾奏之朝廷置而不問秩滿轉真定尹兼河北西路兵馬都總管未幾致仕西歸京兆明年起爲臨洮尹兼熙秦路兵馬都總管華州劉海構亂旣敗籍民之從亂者數千人中彥惟論爲首者戮之西羌吹折密臧隴逋龐拜四族恃險不服使侍御史沙醇之就中彥論方略中彥曰此羌服叛不常若非中彥自行勢必不可卽至積石達南寺酋長四人來與之約降事遂定賞而遣之還奏上大悅遣張汝王馳驛勞之賜以毬文金帶用郊恩加儀同三司以疾卒官年七十五百姓哀號輟市立像祀之

贊曰自古健將武夫其不才者遭世變遷賣降恐後此其常態君子之所不責也酈瓊徐文是已施宜生反覆壬人李成盜賊之靡孔彥舟魚色親出自絕人

類又何責也張中孚中彥雖有小惠足稱然以宋大臣之子父戰沒於金若金若齊義皆不共戴天之讎金以地與齊則甘心臣齊以地歸宋則忍恥臣宋金取其地則又比肩臣金若趨市然惟利所在於斯時也豈復知所謂綱常也哉

吁

宇文虛中字叔通蜀人初仕宋累官資政殿大學士天會四年宋少帝已結盟宗望班師至孟陽宋姚平仲乘夜來襲明日復進兵圍汴少帝使虛中詣宗望軍告以襲兵皆將帥自爲之復請和議如初且視康王安否頃之臺諫以和議歸罪虛中罷爲青州復下遷祠職建炎元年貶韶州二年康王求可爲奉使者虛中自貶中應詔復資政殿大學士爲祈請使是時興兵伐宋已留王倫朱弁不遣虛中亦被留實天會六年也朝廷方議禮制度頗愛虛中有才藝加以官爵虛中卽受之與韓昉輩俱掌詞命明年洪皓至上京見虛中甚鄙之天會十三年熙宗卽位宗翰爲太保領三省事封晉國王乞致仕批答不允其詞虛中作也天眷間累官翰林學士知制誥兼太常卿封河內郡開國公書太祖睿德

神功碑進階金紫光祿大夫皇統二年宋人請和其誓表曰自來流移在南之人經官陳說願自歸者更不禁止上國之於敝邑亦乞並用此約於是詔尙書省移文宋國理索張中孚張中彥鄭億年杜充張孝純宇文虛中王進家屬發遣李正民畢良史還宋惟孟庚去留聽其所欲時虛中子師瑗仕宋至轉運判官攜家北來四年轉承旨加特進遷禮部尙書承旨如故虛中恃才輕肆好譏訕凡見女直人輒以礦鹵目之貴人達官往往積不能平虛中嘗撰宮殿榜署本皆嘉美之名惡虛中者擿其字以爲謗訕朝廷由是媒孽以成其罪矣六年二月唐括酬斡家奴杜天佛留告虛中謀反詔有司鞠治無狀乃羅織虛中家圖書爲反具虛中曰死自吾分至於圖籍南來士大夫家家有之高士談圖書尤多於我家豈亦反耶有司承順風旨并殺士談至今寃之士談字季默高瓊之後宣和末爲忻州戶曹參軍入朝官至翰林直學士虛中士談俱有文集行于世

王倫字正道故宋宰相王旦弟王勉玄孫俠邪無賴年四十餘尙與市井惡少

羣遊汴中天會五年宋人以倫爲假刑部侍郎與閣門舍人朱弁充通問使是時方議伐宋凡宋使者如倫及宇文虛中魏行可顧縱張邵等皆留之不遣居數年倫久困乃唱爲和議求歸元帥府使人謂之曰此非江南情實特汝自爲此言耳倫曰使事有指不然何爲來哉惟元帥察之天會十年劉豫連歲出師皆無功撻懶爲元帥左監軍經略南邊密主和議乃遣倫歸先此宋已遣使乞和朝廷未之許也倫見康王言和議事康王大喜遷倫官并官其子弟宋方與齊用兵未可和天會十五年康王聞天水郡王已薨以倫假直學士來請其喪使倫請撻懶曰河南之地上國旣不自有與其封劉豫曷若歸之趙氏是歲劉豫受封已八年不能自立其國尙勤屯戍朝廷厭其無能爲也乃廢劉豫撻懶以左副元帥守汴京於是倫適至撻懶太祖從父兄弟於熙宗爲祖行太宗長子宗磐以太師領三省事位在宗幹上宗翰薨已久宗幹不能與宗磐獨抗明年天眷元年撻懶與東京留守宗雋俱入朝熙宗以宗雋爲左丞相宗雋太祖子也撻懶宗磐宗雋三人皆跋扈嗜利陰有異圖遂合議以齊地與宋自宗幹

以下爭之不能得以侍郎張通古爲詔諭江南使遣倫先歸明年宋以倫爲端明殿學士簽書樞密院事進金器千兩銀器萬兩復來請天水郡王喪柩及請母章氏兄弟宗族等保信軍節度使藍公佐副之是歲宗磐宗雋撻懶皆以謀反屬吏熙宗誅宗磐宗雋以撻懶屬尊赦其死以爲行臺尙書省事左丞相奪其兵權右副元帥宗弼奏曰撻懶宗磐陰與宋人交通遂以河南陝西地與宋人會撻懶復謀反捕而殺之於邠州倫至上京有司詳讀康王表文不書年閱進奉狀稱禮物不言職貢上使宰相責問倫曰汝但知有元帥豈知有上國耶遂留不遣遣其副藍公佐歸三年五月宗弼復取河南陝西地遂伐江南已渡淮皇統元年宋人請和三年二月宋端明殿學士何鑄容州觀察使曹勛進誓表三月遣左副點檢賽里山東西路都轉運使劉洵送天水郡王喪柩及宋帝母章氏還江南五月李正民畢良史南歸七月朱弁張邵洪皓南歸四年以倫爲平州路轉運使倫已受命復辭遜上曰此反覆之人也遂殺之於上京年六

十一

金

史

卷七十九

列傳

八

中華書局聚

金史卷八十

元中書右丞里相登總裁脫脫等二

列傳第十八

熙宗二子

濟安

斜卯阿里

大臭

本名搭不也 警 本名蒲速越

烏延蒲盧渾

赤盞渾

熙宗諸子悼平皇后生太子濟安賢妃生魏王道濟

濟安皇統二年二月戊子生於天開殿上年二十四始有皇子喜甚遣使馳報

明德宮太皇太后五日命名大赦天下三月甲寅告天地宗廟丁巳翦髻奏告

天地宗廟戊午冊為皇太子封皇后父太尉胡塔為王賜人口馬牛五百駝五

十羊五千隨朝職官並遷一資皆有賜己未詔天下十二月濟安病劇上與皇

后幸佛寺焚香流涕哀禱曲赦五百里內罪囚是夜薨諡英悼太子葬興陵之

側上送至烏只黑水而還命工塑其像于儲慶寺上與皇后幸寺安置之海陵
毀上京宮室寺亦隨毀

道濟皇統三年命爲中京留守以直學士阿懶爲都提點張玄素爲同提點左
右輔導之俄封魏王封其母爲賢妃初居外至是養之宮中未幾熙宗怒殺之
贊曰國初制度未立太宗熙宗皆自諳班勃極烈卽帝位諳班勃極烈者漢語
云最尊官也熙宗立濟安爲皇太子始正各位定制度焉

斜卯阿里父渾坦穆宗時內附數有戰功阿里年十七從其伯父胡麻谷討詐
都獲其弟沙里只高麗築九城於曷懶甸渾坦攻之遇敵於木里門甸力戰久
之阿里挺槍馳刺其將於陣中敵遂潰渾坦與石適歡合兵於徒門水阿里首
敗敵兵取其二城高麗入寇以我兵屯守要害不得進乃還阿里追及于曷懶
水高麗人爭走水上阿里乘之殺略幾盡遂合兵于石適歡道遇敵兵五萬擊
走之又與石適歡遇敵七萬阿里先登奮擊大敗之石適歡曰汝一日之間三
破重敵功豈可忘乃厚賜之幹塞烏睹本攻斡吉城阿里鑿墉爲門日已暮不

可入以兵守之旦日遂取其城烏睹本以被甲并乘馬賜之從攻下寧江州授猛安又從攻信州賓州皆克之遼人來攻孛堇忽沙里城阿里率百餘騎救之遼兵數萬阿里兵少乃令軍士裂衣多爲旗幟出山谷間遼兵望見遽去蘇復州叛衆至十萬旁近女直皆保於太尉胡沙家築壘爲固敵圍之數重守者糧芻俱盡牛馬相食其駝尾人易子而食夜縋二人出告急於阿里阿里赴之內外合擊之破其衆於闢離密罕水上勦殺幾盡水爲之不流蒲离古胡什吉水馬韓島凡十餘戰破數十萬衆契丹奚人聚舟千艘將入于海阿里以二十七舟邀之中流矢臥舟中中夜始蘇敵船已入王家島卽夜取海路追及之敵走險以拒阿里以騎兵邀擊再中流矢力戰不退竟破之盡獲其舟於是蘇復州婆速路皆平攻顯州下靈山縣取梁魚務敗余睹兵功皆最後與散睹魯屯高州契丹昭古牙九斤合與中兵數萬攻胡里特寨阿里以八謀克兵救之胡里特先往敗於城下阿里指陣前緋衣者二十餘人曰此必賊酋也麾兵奮擊皆殺之餘衆大潰來州隰州兵圍胡里特城聞阿里來救卽解圍去闍母討張覺

有兵出樓峯口山谷間阿里散篤魯忽盧補三猛安擊敗之宗望代闍母討張覺阿里再敗平州兵及伐宋阿里別擊宋兵敗之孟陽之役阿里扼橋渡力戰明年再伐宋至保州中山累破之進圍真定阿里與婁室豁魯乘風縱火焚其樓櫓諸軍畢登克其城師至河上粘割胡撒擊走宋人扼河津兵數千遂渡河諸將分出大名境阿里破敵四百盡殪遂圍汴汴中夜出兵來焚攻具阿里與謀克常孫陽阿禦之其衆大潰還攻趙州降之六年伐宋主取陽穀莘縣敗海州兵八萬人海州降破賊船萬餘於梁山泊招降滕陽東平泰山羣盜盜攻范縣擊走之獲船七百艘宗弼攻下睢陽與烏延蒲盧渾先以二千人往招壽春具舟淮水上時康民聚賈船四百與壽春相近尤列速以騎四百破康民斬馘數千與當海大臭破賊十萬於淮南比至江連破宋兵獲舟二百艘宗弼至江寧阿里蒲盧渾別降廣德軍先趣杭州去杭十餘里遇宋伏兵二千取我前驅甲士三十人阿里使諸軍去馬搏戰伏兵敗皆逼死於水宗弼至餘杭而宋主走明州阿里與蒲盧渾以精騎四千襲之破東關兵濟曹娥江敗宋兵於高橋

鎮至明州頗失利宋主已入于海乃退軍餘姚宗弼使當海濟師遂下明州執宋守臣趙伯諤進至昌國縣宋主自昌國走温州由海路追三百餘里弗及遂隳明州與宗弼俱北歸睿宗經略陝西駐涇州阿里先取渭州睿宗趨熙河阿里斜喝韓常三猛安爲前軍十二年與高彪監護水運宋以舟師阻亳州河路擊敗之追殺六十餘里獲其將蕭通破漣水水寨賊盡得其大船遂取漣水軍招徠安輯之天眷間盜據石州阿里討之粘割胡撒與所部先登遂克其城石州平宗弼再伐宋阿里已老督造戰船宋稱臣詔賜阿里錢千萬自結髮從軍大小數十戰尤習舟楫江淮用兵無役不從時人以水星目之爲迭里部節度使歷順義泰寧軍歸德濟南尹天德初致仕加特進封王正隆例封韓國公召赴闕命造戰船以疾薨年七十八諡智敏阿里性忠直多智略兄弟相友愛家故饒財以己猛安及財物盡與弟愛拔里愛拔里不肯受逃避歲餘阿里終與之

突合速宗室子拏罕塞人初隸萬戶石家奴麾下嘗領偏師破雲中諸山寇盜

宗望攻平州遣突合速討應州賊平之撫安其民而還及伐宋在宗翰軍以八謀克破石嶺關屯兵數萬殺戮幾盡師至太原祁縣降而復叛突合速攻下之進取文水縣後從諸師列屯汾州之境宋河東軍帥郝仲連張思正陝西軍帥張關索及其統制馬忠合兵數萬來援皆敗之宗翰南伐至潞還太原猶未下卽留完顏銀朮可總督諸軍經略其地於是宋援兵大至突合速從馬五沃魯破宋兵四千于文水聞宋將黃迪等以兵三十萬柵于縣之西山復與耿守忠合兵九千擊之殺八萬餘人獲馬及資糧甚衆宋制置使姚古率兵至隆州谷突合速與拔离速以步騎萬餘禦之种師中兵十萬據榆次銀朮可乃召突合速使中分其兵而還與活女等合兵八千擊敗之斬師中于殺熊嶺宋將張灝以兵十萬營于文水近郊復與拔离速擊破之潞州復叛宋兵號十七萬骨赧突合速拔离速皆被圍突合速麾軍士下馬力戰遂潰圍而出及再舉伐宋宗翰命婁室率軍先趨汴婁室至澤州突合速沃魯以五百騎爲前驅往招河陽先據黃河津宋兵萬餘背水陣進擊敗之皆擠于水遂降河陽汴京平諸將西

趣陝津略定河東郡縣突合速取憲州遇其援軍擊敗之生擒其將李董濃瑰
尤魯等攻保德未下突合速進兵助擊梯衝並進遂克其城李董烏谷攻石州
屢敗亡其三將軍士死者數百人突合速謂烏谷曰敵皆步兵吾不可以騎戰
烏谷曰聞賊挾妖術畫馬以繫其足疾甚奔馬步戰豈可及之突合速笑曰豈
有是耶乃令諸軍去馬戰盡殪之六年宗輔駐師鄧州突合速馬五拔騫速西
取均房遂下其城攻唐蔡陳州及潁昌府皆克之天眷初除彰德軍節度使三
年爲元帥左監軍皇統八年改濟南尹天德間封定國公授世襲千戶卒年七
十二正隆二年贈應國公初突合速以次室受封次室子因得襲其猛安及分
財異居次室子取奴婢千二百口正室子得八百口久之正室子爭襲連年不
決家貲費且盡正室子奴婢存者二百口次室子奴婢存者纔五六十口世宗
聞突合速諸子貧窘以問近臣具以爭襲之故爲對世宗曰次室子豈當受封
邪遂以嫡妻長子襲

烏延蒲盧渾曷懶路烏古敵昏山人父孛古刺龍虎衛上將軍蒲盧渾膂力絕

人能挽強射二百七十步與兄鶻沙虎俱以勇健隸闍母軍居帳下攻黃龍府力戰有功闍母敗于兔耳山張覺復整兵來諸將皆不敢戰蒲盧渾登山望之乃給諸將曰敵軍少急擊可破也若入城不可復制遂合戰破之郭藥師蔡靖以燕京降蒲盧渾率九十騎先伺察城中居民去就遂將漢兵千隸完顏蒙迨攻真定進攻贊皇取之獲人畜甲仗萬餘汴城破日已暮宋人猶力戰槍刺中蒲盧渾手戰益力遂敗宋軍賜金五十兩睿宗爲右輔元帥已定關陝議取劍外諸州遂拔和尚原元帥府承制以蒲盧渾爲河北西路兵馬都總管及宋主在揚州蒲盧渾與蒙迨將萬騎襲之宋主已渡江破其餘兵後與斜卯阿里俱從宗弼自淮西渡江取江寧宗弼入杭州宋主走明州再走温州由海道追三百餘里隳明州而歸語在阿里傳天眷二年授鎮國上將軍除安國軍以疾去官皇統六年授世襲謀克起爲延安尹賜尚衣一襲尋致仕海陵遷中都起爲歸德尹就其家授之賜銀牌襲衣玉吐鶻馳驛之官蒲盧渾留數十日已違程復聽致仕召赴京師至薊州見海陵于獵所明日從獵獲一狐海陵曰卿年老

尙能馳逐擊獸捷捷如此賜以御服封豳國公除太子少師進太子太保改真定尹入判太宗正事頃之伐宋以本官行右領軍副都督事師次西采石海陵欲渡江蒲盧渾曰宋軍船高大我船庫小恐不可遽渡海陵怒曰汝昔從梁王追趙構於海島皆大舟耶今乃沮吾兵事設不能遽渡江不過有少損耳爾年已七十縱自愛豈有不死理耶明日當與奔睹先濟旣而復止之乃遣別將先渡江舟小不可戰遂失利兩猛安及兵士二百餘人皆陷沒海陵遇害軍還大定二年至中都上謁除東京留守世宗召問年幾何對曰臣今年七十三矣上曰卿宿將久練兵事年雖老精神不衰因命到官每旬月一視事賜衣一襲進階開府儀同三司仍封豳國公是歲卒十八年孫扎虎遷廣威將軍襲烏古敵昏山世襲猛安并親管謀克

赤盞暉字仲明其先附於遼居張皇堡故嘗以張爲氏後家萊州暉體貌雄偉慷慨有志略少遊鄉校遼季以破賊功授禮賓副使領萊隰遷潤四州屯兵天輔六年降仍命領其衆從闍母定興中府義錦等州及破張覺皆與有功以粟

萬五千石助軍授洛州刺史宗望初伐宋孟陽之戰敵之中軍徑薄宗望營暉與諸將擊敗之追殺至城下訖師還數立戰功明年再舉伐宋攻下保州真定暉皆與焉進圍汴宋人夜出兵二萬焚我攻具暉以二謀克兵擊走之凡城中出兵拒戰暉之所當無不勝捷既克宋還從攻河間敵將李成以雄莫之兵來援暉與所部迎擊馬傷而墮暉輒奮起步鬪竟敗成兵是日凡七戰皆勝敵人多逼死濠隍間暉兩臂亦數中流矢賊將劉先生以兵二萬夜襲營暉力戰達旦賊始敗走皆溺死于水暉復傅城力戰如是連月諸軍四面合攻遂克之加桂州管內觀察使因留撫河間時居民皆爲軍士所掠老幼存者亡幾暉下令軍中聽贖還之未幾皆按堵如故從睿宗經略山東既攻下青州復從闍母攻濰州暉督其裨校先登而城中積芻茭乘風縱火發機石暉率將士衝冒而下力戰敗之軍還復以三十騎破敵于范橋帥府承制加靜江軍節度使進攻城中砲出幾中暉拂其甲裳裂之暉益奮攻卒破其城又從攻泗州克之還屯汶陽破賊衆于梁山灤獲舟千餘移軍攻濟州既敗敵兵因傅城諭以禍福乃舉

城降暉約束軍士無秋豪犯自是曹單等州皆聞風而下從攻壽春歸德及渡淮爲先鋒遇重敵于秀州蘇州皆擊敗之遂至餘杭通糧餉治橋道暉之力爲多乃還載資治通鑑版以歸大軍過江寧徙其官民北渡時暑多疾疫老弱轉死道路其知府陳邦光者訴于宗弼怒將殺之暉曰此義士也力營救之竟得免富平之戰暉左右翼遇瘴而敗睿宗念其前功杖而釋之師至熙河暉別降諸寨將鈐轄及吐蕃酋長等并民戶萬五千餘蘭州叛與訛魯補等攻下之獲河州安撫使白常熙河路副都總管劉維輔以獻還攻慶陽兩敗重敵殺其將戴巢師還遷歸德軍節度使宋州舊無學暉爲營建學舍勸督生徒肄業者復其身人勸趨之屬縣民家奴王夔者嘗業進士暉以錢五十萬贖之使卒其業夔後至顯官密州吏龐乙卒於官其孤貧不克葬暉爲營治葬事且資給其家十三年復從大軍渡淮還鎮丁母憂尋以舊職起復既廢齊爲安化軍節度使天眷二年復河南宋人乘間陷海州帥府以登萊沂密四州委暉經畫敵無敢窺其境者爲定海軍節度使尋改濟南尹累遷光祿大夫俄以罪罷久之起爲

昌武軍節度使天德二年遷南京留守尋改河南路統軍使授世襲猛安拜尙書右丞封河內郡王歲餘拜平章政事封戴王正隆初出爲興平軍節度使正隆降王爵爲樞密副使封景國公未幾復爲左丞封濟國公尋除大興尹封榮國公薨年六十五大定間諡曰武康子師直登進士第

大臭本名撻不野其先遼陽人世仕遼有顯者太祖伐遼遼人徵兵遼陽時臭年二十餘在選中遼兵敗臭脫身走寧江寧江破臭越城而逃爲軍士所獲太祖問其家世因收養之收國二年爲東京奚民謀克是時初破高永昌東京旁郡邑未盡服屬使臭伺察反側有聞必達太祖以爲忠實授猛安兼同知東京留守事取中西兩京隸闍母軍遼軍二十萬來戰吳王使臭以本部守營臭堅請出戰不許或謂臭曰戰危事獨苦請何也臭曰丈夫不得一決勝負尙何爲苟臨戰不捷雖死猶生也吳王聞而壯之乃遣出戰旣合戰闍母軍少却遼兵後躡之臭麾本部兵橫擊殺數百人由是顯名軍中天會三年宗望伐宋信德府居燕汴之中可駐軍以濟緩急欲遂攻之恐不能亟下議未決臭獨率本部

兵選善射者射其城樓別以輕銳潛升於樓角之間遂克其城軍至濬州宋人已燒河橋宗望下令軍中有能先濟者功爲上臭捕得十餘舟使勇悍者徑渡擊其守者而奪其戍柵由是大軍俱濟明年再伐宋授萬戶賜金牌旣破汴京臭爲河間路都統已克河間闞母怒其不早降因縱軍大掠臭諫止之已掠者官爲贖還除河間尹從攻襲慶府先一日臭命軍士預備畚鍤及薪旣傅城諸將方經營攻具未鳴鼓臭軍有素備遂先登軍帥以臭未鳴鼓輒戰不如軍令請罪臭朝廷釋弗問仍例賞之宗弼伐江南濟淮宋將時康民率兵十七萬來拒臭率本部從擊敗之復以騎二千與當海擊敗淮南賊十萬殺萬餘人王善來降將渡江臭軍先渡舟行去岸尙遠宋列兵江口臭視其水可涉則麾兵捨舟趨岸疾擊之宋兵走大軍相繼而濟俄遇杜充兵六萬於江寧之西臭與鶻盧補擊走之師還臭留爲揚州都統經略淮海高郵之間再爲河間尹兼總河北東路兵馬十一年入見太宗賜坐慰勞甚久特遷太子太保賜衣一襲馬二匹及鞍轡鎧甲改元帥右都監齊國廢臭守汴京熙宗念臭久勞降御書寵異

之天眷三年罷漢渤海千戶謀克以臭舊臣獨命依舊世襲千戶是歲拜元帥右監軍宗弼再伐宋宋人稱臣乞和遂班師臭獨留汴行元帥府事皇統三年加開府儀同三司八年進左監軍天德二年改右副元帥兼行臺右丞遷平章行臺省事進行臺右丞相右副元帥如故海陵疑左副元帥撒离喝以爲行臺左丞相使臭伺察之詔軍事不令撒离喝與聞撒离喝不知海陵意旨每與臭爭軍事不能得遂與臭有隙海陵竟殺撒离喝召臭入朝拜尙書右丞相封神麓郡王四年請老爲東京留守貞元三年拜太傅領三省事累封漢國王十二年有疾海陵幸其第問之是歲薨年六十八海陵親臨哭之詔有司廢務三日禁樂三日其三日當賜三國使館燕以不賜教坊樂命左宣徽使敬嗣暉宣諭之贈太師晉國王諡傑忠遣使護喪歸葬正隆奪王爵贈太傅梁國公子磐之磐本名蒲速越以大臣子累官登州刺史襲猛安大定三年除嵩州刺史從僕散忠義伐宋有功五年召爲符寶郎遷拱衛直都指揮使初磐以伐宋功進官一階磐心少之頗形于言上聞之下吏按問杖一百五十改左衛將軍詔求良

弓譬多自取及護衛入直者輒以己意更代護衛婁室告其事詔點檢司詰問譬有妹在宮中爲寶林譬屬內侍僧兒員思忠使言于寶林曰我無罪問事者追我使自誣服寶林訴于上上怒杖僧兒一百譬責隴州防禦使上戒之曰汝在近密執迷自用朕以卿父之功不忍廢棄姑令補外其思勉之改亳州防禦使遷武寧軍節度使坐事除名起爲韓州刺史改祁州刺史復坐事削四官解職久之尙書省奏大譬以年當敘上曰剛暴之人屢冒刑章不可復用太傅大臬別無嫡嗣其世襲猛安謀克不可易也

阿离補宗室子系出景祖屢從征伐滅遼舉宋皆有功天會九年睿宗經略陝西阿离補爲左翼都統與右翼都統宗弼撫定鞏洮河西寧蘭廓等州軍來賓定遠和政甘峪寧洮安隴等城寨及鎮堡蕃漢營部四十餘處漢官軍民蕃部酋長甚衆於是涇原熙河兩路皆平詔以兄猛安沙离質親管謀克之餘戶以阿离補爲世襲謀克天會十二年爲元帥右都監十五年遷左監軍天眷三年從宗弼復河南遷左副元帥皇統三年封譚國公六年爲行臺左丞相元帥如

故是歲薨大定間大褒功臣圖像衍慶宮歡都死康宗時不及與馳驚遼宋之郊然而異姓之臣莫先焉故定衍慶亞次功臣代國公歡都金源郡王石土門徐國公渾黜鄭國公謾都訶濮國公石古乃濟國公蒲查韓國公斜卯阿里元帥左監軍拔离速魯國公蒲察石家奴銀青光祿大夫蒙适隨國公活女特進突合速齊國公婆盧火開府儀同三司烏延蒲盧渾儀同三司阿魯補鎮國上將軍烏林答泰欲太師領三省事勛太傅大臯大興尹赤蓋暉金吾衛上將軍耶律馬五驃騎衛上將軍韓常并阿离補咸著勳焉子言方言別有傳

方以宗室子累官京兆少尹遷陝西路統軍都監方專事財賄不恤軍旅詔戒之曰卿宗室舊人乃縱肆敗法惟利是營朕甚惡之自今至於後日萬一爲之必罰無赦大定三年遷元帥右都監轉元帥左監軍改順天軍節度使上曰卿本無功歷顯仕不能接僚友往往交惡在京兆貪鄙彰聞至無謂也朕念卿已過中年必能悛改慎勿復爾除西南路招討使朝廷以兵部郎中高通爲招討都監以佐之詔通曰卿到天德毋以其官長曲從之也簡閱沿邊士卒毋用孱

弱之人毋以僕隸代役女直舊風凡酒食會聚以騎射爲樂今則奕碁雙陸宜
悉禁止令習騎射從其居處之便亦不可召集擾之久之方坐強買部人馬二
匹削一階解職降耀州刺史通亦坐賊除名方後遷橫海軍節度使入爲同簽
大宗正事簽書樞密院事初阿魯當授謀克未封而薨烏帶受之烏帶死兀答
補襲之兀答補死烏也阿補當襲是時已降海陵爲庶人世宗以烏帶在熙宗
逆黨中其子孫不合受封停封者久之而阿离補功亦不可廢絕特詔方襲之
云

贊曰斜卯阿里突合速烏延蒲盧渾赤盞暉大臭阿离補等六人皆收國以來
所謂熊羆之士不二心之臣也其功有可錄者焉

金史卷八十

金史卷八十一

元中書右丞相總裁脫脫等修

列傳第十九

鶻謀琶

迪姑迭

阿徒罕

夾谷謝奴

阿勒根沒都魯

黃摺敵古本

蒲察胡蓋

夾谷吾里補

王伯龍

高彪

溫迪罕蒲里特

伯德特离補

耶律懷義

蕭王家奴

田灝

趙賊

鶻謀琶尤吉水斜卯部人也性忠直寬厚重節義勇於戰父阿鶻土贈金吾衛上將軍穆宗時鶻謀琶內附先遣子寧吉從間道送款遂使活里曠與鶻謀琶合軍攻降諸部因領其衆與弟胡麻谷渾坦姪阿里等攻下諸城從撒改破塢塔城穆宗屢賞之破高麗戍兵與石適歡討平諸部蒲察部雅里孛堇與其兄弟胡八雙括等欲叛歸遼鶻謀琶執之送于康宗賜賚甚厚破高麗曷懶甸及下陞魯城有功天輔六年卒年七十二天眷中贈銀青光祿大夫

迪姑迭温迪罕部人祖扎古迺父阿胡迭世爲胡論水部長迪姑迭年二十餘代領父謀克攻寧江州敗遼援兵獲甲馬財物攻破奚營回至韓州遇敵二千人擊走之幹魯古與遼人戰於咸州兵已却迪姑迭以本部兵力戰諸軍復振遂大破之護步答岡之役乙里補孛堇陷敵中迪姑迭援出之攻黃龍府身被數創授猛安天輔七年從上至山西病卒年四十七天眷中贈光祿大夫

阿徒罕温迪罕部人年十七從撒改幹帶等討平諸部皆身先力戰高麗築九城于曷懶甸幹塞禦之阿徒罕爲前鋒高麗有屯于海島者阿徒罕率衆三十人夜渡焚其營柵戰艦大破之遂下駝吉城旣而入城皆下功最遼兵自寧江州東門出阿徒罕逆擊盡殪之以功授謀克從攻黃龍府力戰身被數十創竟登其城後與烏論石準援照散城阿徒罕請乘不備急擊之遂夜過益褪水詰朝大敗之幹魯上其功賜幣與馬天輔四年五月疾病賜良馬一匹詔曰汝安則乘之年六十五卒上悼惜之遣使弔祭以馬爲贈阿徒罕爲人孝悌好施惠健捷善弋獵至角觝擊鞠咸精其能

夾谷謝奴隆州納魯悔河人也國初祖阿海率所部來歸獻器用甲仗父不刺速襲本部勃堇從太祖伐遼授世襲猛安親管謀克爲曷懶路都統謝奴其長子也長身多髯善騎射通女直契丹大小字及漢字旣冠隨其父見太祖命佩金牌總領左翼護衛西京未下謝奴獲城中生口乃知城中潛遣人求救於外都統府得爲之備却其救兵西京乃下自燕京還過判泥恩納阿遇敵於隘謝奴身先士卒射殺敵中先鋒二人敵潰走總管蒲魯虎以甲及馬贈之後領其父猛安從攻和尚原出仙人關宋兵據險猛安雖訛只突戰不克謝奴選麾下五十人戰克之與吳玠相拒烏里雅行陣不整吳玠乘之謝奴領兵逆戰遂大破敵計前後功襲其父猛安謀克宗弼復取河南陝西宋人欲潛兵襲取石閭諸營謝奴自渭南大禹鎮掩其伏兵射中其軍帥宋兵敗走多獲旗幟兵仗帥府厚賞之除華州防禦使入爲工部侍郎遷本部尙書改平涼尹昭義軍節度使大定初卒

阿勒根沒都魯上京納鄰河人也後徙咸平路梅黑河雄偉美鬚勇毅善射

國初伐遼沒都魯在軍中領謀克猛安每遇敵往來馳突人莫敢當故所戰皆克皇統元年計功擢宣威將軍明年授同知通遠軍節度使改移刺都乂詳穩授世襲本路寧打渾河謀克爲滑州刺史改肇州防禦使蒲與路節度使遷驃騎上將軍是歲以年老致仕卒累官金吾衛上將軍年七十三

黃摑敵古本世居星顯水從破寧江取咸州平東京路及諸山寨柵皆有功從麻吉破遼將和尚節使兵七千於上京復破那野軍二萬再從麻吉遇敵於阿鄰甸麻吉被創不能戰敵古本率兵擊敗之勦殺殆盡從攻回鶻城破其兵九萬敗木匠直撒兵於山後俘獲甚衆敗昭古牙之兵三千獲其家屬而還攻平州張覺吾春被圍於西山敵古本引兵救之解其圍并獲糧五千斛招降戶口甚衆從平與中撫安其民人天會間大軍伐宋敵古本從取濬開德大名及取濟南高唐棣密等州皇統間以功襲謀克移屯於壽光縣界爲千戶六年授世襲千戶棣州防禦使卒

蒲察胡盞案出澣水人年十八從軍其父特廝死襲爲謀克天輔間夏以兵三

萬出天德路胡蓋從婁室迎戰以兵三百敗敵二千天會三年大軍攻太原城中出兵萬餘來戰胡蓋以所領千戶軍擊之復敗敵兵三萬餘於榆次境六年從婁室攻京兆以所部兵屢與宋人接戰皆先登有功七年取邠州遇宋人二十餘萬我軍右翼少却時胡蓋爲左翼千戶摧鋒陷陣敵遂敗去敗張浚富平復有功十三年擊關師古於臨洮衆三萬餘從攻涇州從破德順秦鞏臨洮河蘭等州破吳璘兵胡蓋皆有力焉授德順州刺史改隴州防禦使鳳翔尹卒年五十五

夾谷吾里補暗土渾河人徙天德父兀屯討烏春窩謀罕有功吾里補隸婁室帳下攻係遼女直招降太彎照三等從婁室救幹魯古于威州敗遼兵于押魯虎城遼軍營遼水吾里補五謀克軍乘夜擊之遼軍驚潰殺獲幾盡幹魯伐高永昌吾里補以數騎奮擊於遼水之上復以四十騎伏于津要遇其候騎擊之獲生口因盡知永昌虛實太祖嘉之賞奴婢八人永昌駐軍於兔兒陀先據津要軍不得渡吾里補與撒八射殺其先鋒二人永昌衆稍却大軍遂渡遼水及

攻廣寧軍帥選勇士先登吾里補與赤盞忽沒渾各領所部突入其陣大軍繼之遂拔廣寧太祖攻臨潢吾里補面被重創奮擊自若賞以遼宮女二人遼王杲已取中京吾里補以四十騎覘敵獲遼喉舌人因知遼主所在後從都統幹魯定雲中從宗翰屯應州遼軍在近境吾里補以所部擊敗之宗望伐宋宋安撫使蔡靖詣吾里補降婁室攻陝西諸郡往往復叛吾里補攻敗之敗張浚軍于富平吾里補先登睿宗賞以金器名馬遂以先鋒攻蘭州下其城加昭武大將軍授世襲猛安累官字特本部族節度使以老致仕封芮國公吾里補多智略膂力過人雖甚老勇健不少衰大定初劇賊嘯聚出特鄙關吾里補率鄉里年少逆擊之賊黨遂潰事聞賞賚甚厚大定二十六年卒一百有五歲

王伯龍瀋州雙城人也遼末聚黨爲盜天輔二年率衆二萬及其輜重來降授世襲猛安知銀州兼知雙州三年太祖攻臨潢伯龍與韓慶和以兵護糧餉輓夫千五百人皆授甲慶和已將兵行前伯龍從糧居後遇遼兵五千餘邀於路伯龍率輓夫擊敗之獲馬五十匹四年從攻下中京并克境內諸山寨爲靜江

軍節度留後五年真授節度使從宗望討張覺於平州伯龍先登馳擊手殺數十百人遷右金吾衛將軍白河之戰伯龍當其左軍麾兵疾馳蹂之宋軍亂我師乘勝奮擊敗之宗望伐宋伯龍爲先鋒次保州遇敵五萬破之招降新樂軍民十餘萬大軍圍汴宋太尉何臬以軍數萬出酸棗門伯龍以本部遮擊多所斬獲及破汴伯龍以治攻具有功進破孔彥舟酈瓊衆三萬於洛州是年同知保州兵馬安撫司事將兵數千攻北平拔之復取保州河間睿宗經略山東伯龍從攻青州未下城中夜出兵襲伯龍營伯龍不及甲獨被衣挺刃拒營門敵不得入因奮擊殺數十人已而軍士皆甲出殺傷宋兵不可勝計并獲其一將斬之及下青州第功伯龍第一六年還攻莫州降之加太子少保莫州安撫使破李固寨衆十餘萬於濮州濮城守城中鎔鐵揮我軍攻之不能剋伯龍被重甲首冠大釜挺槍先登殺守陴者二十餘人大軍相繼而上遂剋之進攻徐州伯龍復先登充徐宿邳三路軍馬都統敗高托山之衆十五餘萬於清河進擊韓世忠於邳州走之與大軍會於宿遷追世忠至揚州還攻泗州泗州守將以

城降屯軍磁陽破陳宏賊衆四十餘萬破黃戩於單州進攻歸德軍帥遣伯龍立攻具伯龍從二十餘騎行視地形城中忽出兵千餘欲生得伯龍伯龍縱騎馳之敵兵亂墮隍而死者幾二百人破王善之衆於巢縣取廬州和州伯龍之功多軍渡采石擊敗岳飛劉立路尙等兵獲芻糧數百萬計還過真揚道遇鄺瓊韓世忠軍復戰敗之復爲莫州安撫改知澤州太行羣賊往往嘯聚伯龍皆平之天眷元年爲燕京馬軍都指揮使從元帥府復收河南權武定軍節度使兼本路都統宋兵據許州伯龍擊走之招復其人民是年秋泰安卒徒張貴驅脅良民據險作亂伯龍討平之皇統元年以本部從宗弼南伐攻破濠州而還三年爲武定軍節度使改延安尹寧昌軍節度使天德三年改河中尹徙益都尹封廣平郡王卒年六十五正隆間例贈特進定國公

高彪本名召和失辰州渤海人祖安國遼興辰開三鎮節度使父六哥左承制官至刺史彪始生其父用術者言爲其時日不利於己欲不舉其母爲營護居數歲竟逐之彪匿於外家遼人調兵東京時六哥已老當從軍悵然謂所親曰

吾兒若在可勝兵矣所親具以實告因代其父行戰於出河店遼兵敗走彪獨力戰軍帥見之曰此勇士也令生致之韓魯攻東京六哥率其鄉人迎降以爲榆河州千戶久之告老彪代領其衆都統杲攻中京彪領謀克從韓魯破遼將合魯燥及韓慶民於高惠之境已而駐軍武安合魯燥以勁兵二萬來襲從韓魯出戰與所部皆去馬先登奮擊敗之奚人負險拒命所在屯結彪屢戰有功宗望攻平州彪徇地西北道破敵招降石家山寨再從宗望伐宋爲猛安師次真定彪率兵士七十人臨城築甬道城中夜出兵焚攻具彪擊走之大軍圍汴以五十騎屯於東南水門宋人再以重兵出戰彪皆敗之師還屯鎮河朔復破敵於霸州擒其裨將祝昂河間夜出兵二萬襲我營壘彪率三謀克兵擊敗之天會五年授靜江軍節度使壽州刺史明年伐宋從帥府徇地山東攻城克敵數被重賞七年師至睢彪以所部招誘京西人民次柘縣其官吏出降彪獨與五十餘騎入城繼而城中三千餘人復叛彪率其衆力戰敗之撫安其民而還從梁王宗弼襲康王至杭州師還宋將韓世忠以戰艦數百扼於江北宗弼引

而西將至黃天蕩敵舟三十餘來逼南岸其一先至者載兵士二百餘彪度垂及以鈎拽之率勇士數十躍入敵舟所殺甚衆餘皆逼死於水中明年從攻陝西師至寧州彪與宗人昂率兵三千取廓州始至有來降者言城東北隅守兵將謀爲內應彪卽夜從家奴二人以登左右守者覺之彪與從者皆殊死戰諸軍繼進遂克其城從攻和尚原及仙人關與阿里監護漕糧并戰艦至亳州宋人以舟五十艘阻河路擊敗之擒其將蕭通擊漣水賊水寨進取漣水軍其官民已遁去悉招降之彪勇健絕人能日行三百里身被重鎧歷險如飛及臨敵身先士卒未嘗反顧大小數十戰率以少擊衆無不勝捷齊國旣廢攝滕陽軍以東諸路兵馬都統撫諭徐宿曹單滕陽及其屬邑皆按堵如故爲武寧軍節度使頗贖貨嘗坐臧海陵以其勳舊杖而釋之改忻州防禦使歷安化安國武勝軍節度使遷行臺兵部尙書改京兆尹封郃國公以憂去官起復爲武定軍節度使歸德尹正隆例授金紫光祿大夫久之致仕復起爲樞密副使舒國公賜名彪卒年六十七諡桓壯彪性機巧通音律人無貴賤皆溫顏接之

溫迪罕蒲里特隆州移离閔阿胡勒出寨人也魁梧美髯有謀略以智勇聞都
統杲取中京蒲里特權猛安領軍五千遇契丹賊萬餘與戰敗之出袁古里道
敗敵八千餘至臘門華道復以伏兵敗敵萬人太祖定燕自儒州至居庸關執
其喉舌人有頃賊三千餘人復寇臘門華道蒲里特整隊先登賊識其旗幟望
風而遁遂奮擊之親執賊帥皇統元年從梁王宗弼伐宋留軍唐州敵衆奄至
蒲里特擊之大名軍萬四千號二十萬蒲里特率親管猛安身先士卒衝擊敵
少却乃張左右翼併擊之敵衆散走而別遇兵二萬來援復以兵三千擊走之
時邳州土賊嘯聚幾二十萬蒲里特軍三千分爲數隊急攻之賊潰去南京路
遇敵軍二萬蒲里特以軍三千擊敗之是日有兵自城中出者復擊敗之皇統
二年遷定遠大將軍同知鳳翔尹六年改京北尹轉寧州刺史改西北路招討
都監遷永定軍節度使海陵南征改武衛軍都總管大定三年授開遠軍節度
使改泰寧軍卒十九年以功授其子兀帶武功將軍本猛安奚出痕世襲謀克
伯德特离補奚五王族人也遼御院通進天會初與父撻不也歸朝授世襲謀

克後以京兆尹致仕特离補招降松山等州未附軍民及招降平州蘇州境內督之耕作宗望伐宋特离補爲軍馬猛安與諸將留規取保遂安三州攻安肅軍河間雄保等兵十餘萬來救特离補率所部先戰大軍繼之大破其兵遂拔安肅特离補攝通判事降將胡愈陰結衆謀亂特离補勒兵擒愈及其衆五十餘人安肅軍改爲州就除同知州事改磁州捕獲太行羣盜元帥府以磁相二州屯兵屬之擒王會孫小十苗清等羣盜遂平遷濱州刺史廉入優等以母憂去官起復本州改涿州刺史入爲工部郎中從張浩營繕東京宮室及田穀黨事起朝省爲之一空特离補攝行六部事遷大理卿出爲同知東京留守天德三年復爲大理卿同知南京留守丁父憂起復洺州防禦使正隆盜起州縣無兵不能禦洺舊有河附于城下特离補乃引水注濠中以爲固盜弗能近州賴以安遷崇義軍節度使未幾告老歸田里卒特离補爲人孝謹爲政簡靜不積財常曰俸祿已足養廉衣食之外何用蓄積凡調官行李止車一乘婢僕數人而已

耶律懷義本名孛迭遼宗室子年二十四以戰功累遷同知點檢司事宗翰已取西京遼主謀奔于夏懷義諫止之不見聽乃竊取遼主殿馬來降太祖自燕還師留宗翰幹魯經略西方懷義領謀克從軍天會初帥府以新降諸部大小遠近不一令懷義易置之承制以爲西南路招討使乃擇諸部衝要之地建城市通商賈諸部兵革之餘人多匱乏自是衣食歲滋畜牧蕃息矣從宗翰伐宋降馬邑破鴈門屯兵進攻太原以所部別降清源縣徐溝鎮遂與諸將別屯汾州之境時河東陝西路兵來救太原劉光世折可求柵于文水西山懷義捕得生口盡知宋兵屯守要害乃分兵襲敗之明年再伐宋從婁室取汾州及其屬邑遂過平陽出澤潞以趨河陽所至皆降及大軍圍汴懷義屯京西汴城既下宋兵之出奔者邀擊盡之從攻鄭鄧州及討平鄭州叛者攻下濮州及雷澤縣從破大名東平府徐兗等州皆有功七年還鎮十年加尙書左僕射改西北路招討使懷義在西陲幾十年撫御有恩及去老幼遮道攀戀數日不得發天眷初爲太原尹治有能聲改中京留守從宗弼過烏納水還中京以老乞致仕不

許改大名尹命不赴治所止以俸廉給之每歲春水扈從餘聽自便明年再請老得謝給俸廉之半海陵卽位封漆水郡王進封莘王久之進封蕭王正隆例封景國公其子神都幹爲西北路招討都監迎侍之官神都幹從海陵南征懷義卒于雲中年八十二

蕭王家奴奚人也居庫党河爲人魁偉多力未冠仕遼爲太子率府率天輔七年都統杲定奚地王家奴率其鄉人來降命爲千戶領之奚王回离保旣死其親黨金臣阿古者猶保撒葛山王家奴與突撚往討之生擒金臣阿古者降其餘衆時平灤多盜王家奴以所部屢破賊兵斬馘執俘數被賞賚宗望伐宋敗郭藥師於白河亦與有功至河上宋兵扼津要與諸將擊敗之進圍汴破其東門兵明年再伐宋宗望軍至中山諸門分兵出戰焚我攻具祈州河間各以兵來援皆敗之師還屯鎮河朔濱州賊葛進聚衆數萬臨淄李董照里以騎兵二千討之王家奴領謀克先登力戰大破其衆明年攻滄州宋兵拒戰復從照里擊走之宋將徐文以舟百艘泊海島卽以商船十八進襲斬首七百級獲舟二

十天會八年除靜江軍節度使授世襲千戶從梁王宗弼征伐爲萬戶還爲五院部節度使天德二年改烏古迪烈招討都監卒

田灝字默之與中人遼天慶八年進士歷官金部員外郎權歸德節度使太祖定燕灝舉四州版圖歸朝加都官郎中權節度使事四遷知真定府事招降齊博游貴等賊衆五千餘人已而貴復叛去灝遣齊博僞叛從貴因令伺間殺之降其衆賊壘悉平三遷行臺左丞彰德軍節度使是時新定力役灝蠲籍之半而上之故相之繇賦比他州獨輕徙同知河北東路都總管改同簽燕京留守司事民遮留不得出易服夜去改河東南路轉運使尋改絳陽軍節度使居三年以疾請謝事徑解印歸數奏不允移鎮振武軍入爲刑部尙書居三月請老卒于家

趙臧字德固遼陽人其婦翁以優伶得幸於遼主臧補閣門祇候累遷太子左衛率後居灤州宗望討張覺臧踰城出降授洛苑副使爲灤州千戶遷洛苑使檢校工部尙書從伐宋至汴遷棣州刺史侍衛步軍都虞候及再伐宋攻真定

與有功改商州刺史檢校尚書右僕射五年同知信德府路統押軍兵兼沿邊
安撫司事明年權知濟州事八年從定河南授隴州團練使十年改知石州賊
久在兵間不善治民坐謗議謫監平州甜水鹽齊國廢河南皆以宿將守之授
賊宿州防禦使統本路軍兵賊重義接儒士嘗以事至汴有故人子負官錢百
萬賊以橐金贈之其子悉爲私費復代輸之頃之有訟徐帥不法者朝廷使賊
鞠治賊委曲營護坐是廢罷寓居於燕海陵出領行臺省至燕賊往見之因訴
其事及海陵卽位起爲保大軍節度使貞元初改內省使未幾爲中都路都轉
運使明年再徙順義興平入爲太子詹事鎮沁南以疾卒年六十六後十餘年
賊子孫司徒張通古子孫皆不肖淫蕩破貲產賣田宅世宗聞之詔曰自今官
民祖先亡沒子孫不得分割居第止以嫡幼主之母致鬻賣仍著于令

金史卷八十二

元中書右丞相總裁各脫八脫等又修

列傳第二十

郭藥師子安國 耶律塗山 烏延胡里改 烏延吾里補

蕭恭 完顏習不主 紇石烈胡刺 耶律恕

郭企忠 烏孫訛論 顏蓋門都 僕散渾坦

鄭建充 烏古論合三 移刺温 蕭仲恭子拱

蕭仲宣 高松

海陵諸子

光英 元壽 矧思阿補

廣陽

郭藥師渤海鐵州人也遼國募遼東人為兵使報怨于女直號曰怨軍藥師為其渠帥幹魯古攻顯州敗藥師于城下遼帝亡保天德耶律捏里自立改怨軍為常勝軍擢藥師諸衛上將軍捏里死其妻蕭妃稱制藥師以涿易二州歸于

宋藥師以宋兵六千人奄至燕京甄五臣以五千人奪迎春門皆入城蕭妃令閉城門與宋兵巷戰藥師大敗失馬步走踰城以免宋人猶厚賞之太祖割燕山六州與宋人宋使藥師副王安中守燕山及安中不能庇張覺而殺之函其首以與宗望藥師深尤宋人而無自固之志矣宗望軍至三河藥師等拒戰于白河兵敗藥師乃降宗望遂取燕山太宗以藥師爲燕京留守給以金牌賜姓完顏氏從宗望伐宋凡宋事虛實藥師盡知之宗望能以懸軍深入駐兵汴城下約質納幣割地全勝以歸者藥師能測宋人之情中其肯綮故也及兩鎮不受約束命諸將討之藥師破順安軍營殺三千餘人海陵卽位詔賜諸姓者皆復本姓故藥師子安國仍姓郭氏

郭安國藥師子也累遷奉國上將軍南京副留守貞元三年南京大內火海陵使右司郎中梁鉞同知安武軍節度使王全按問失火狀留守馮長寧都轉運使左瀛各杖一百除名安國及留守判官大良順各杖八十削三官火起處勾當官南京兵馬都指揮使吳濬杖一百五十除名失火位押宿兵吏十三人並

斬諭之曰朕非以宮闕壯麗也自卽位以來欲巡省河南汝等不知防慎致外方姦細燒延殆盡本欲處爾等死罪特以舊人寬貸之押宿人兵法當處死疑此輩容隱姦細故皆斬也安國性輕躁本無方略海陵將伐宋以安國將家子擢拜兵部尙書改刑部尙書軍興領武捷軍都總管與武勝武平軍爲前鋒海陵授諸將方略安國前奏曰趙構聞王師至其勢必逃竄臣等不以遠近追之獲而後已但置之何地海陵大喜曰卿言是也得構卽置之寺觀嚴兵守之及聞世宗卽位海陵謀北還更置浙西道兵馬都統制府以完顏元宜爲都統安國副之及海陵遇弒衆惡安國所爲與李通輩皆殺之

贊曰郭藥師者遼之餘孽宋之厲階金之功臣也以一臣之身而爲三國之禍福如是其不侔也魏公叔座勸其君殺衛鞅豈無所見歟

耶律塗山系出遙輦氏在遼世爲顯族塗山仕至金吾衛大將軍遙里相温遼帝奔天德塗山以所部降宗翰承制授尙書爲西北路招討使宗翰伐宋塗山率本部爲先鋒至汾州遇宋將折家軍請濟師併力破之從攻太原隆德府從

入汴克洛陽及從婁室平陝右天會七年授太子少保十年遷尙書左僕射致仕卒年九十一正隆例贈特進郜國公

烏延胡里改曷懶路星顯水人也後授愛也窟謀克因家焉從闍母圍平州有功及伐宋圍汴五謀克與宋兵萬人遇于城南胡里改先馳擊敗之元帥府遂賞良馬一匹五年攻宗城縣敵棄城走恩州胡里改追殺千餘人獲車四百輛帥府賞牛三十頭馬一匹七年討泰山羣盜平之毀其營柵兗州羣寇三千餘保據山險胡里改復破之賞牛二十二頭馬四匹八年攻廬州至柘臯鎮胡里改領甲士三十爲前鋒執宋所遣持書與劉四廂錡者七人復以先鋒軍攻和州比至含山縣五里獲甲士二人乃知宋三將將兵且至胡里改伏其軍遂獲姚觀察帥府賞馬二匹九年定陝右胡里改以所部遇敵千人敗之生擒甲士一人盡得敵之虛實又從蒲魯渾徇地熙秦敗敵兵二千於秦州賞馬一匹宋人屯襄陽府監軍按補遣胡里改領四猛安往攻之宋兵三千已渡江方營壁壘乘其未就突戰破之梁王宗弼復河南將攻陳州遣胡里改以甲士三十捕

偵候人至蔡州西遇兵八十餘戰敗之獲南頓縣令及攻陳州夜將四更忽聞敵開門潰走胡里改亟領二謀克軍追及之而猛安突葛速亦領軍繼至大敗之皇統二年遷定遠大將軍八年授臨洮少尹兼熙秦路兵馬副都總管九年改同知京兆尹兼本路兵馬都總管天德改同知平陽尹兼河東南路兵馬都總管貞元三年改同知曷懶路總管大定四年授胡里改節度使七年改歸順軍節度使十年移鎮顯德卒官年六十九十九年詔授其子五十六武功將軍世襲本路婆朵火河謀克

烏延吾里補曷懶路禪嶺人也徙大名路天會中從其父達吉補隸元帥右監軍麾下撻懶以事赴闕以達吉補自隨吾里補領其父謀克從大軍攻滄州方夷濠隍城中兵來拒吾里補以本部擊却之王師下青州力戰有功獲馬百匹以獻降獲賊黨甚衆青州戍將覲吉補以萊州兵衆請濟於帥府吾里補將十二謀克兵往救之遂降其四營拔其一營得戶四千又敗賊兵五萬于恩州攻破其營降戶五萬獲牛畜萬餘將至臨清縣遇敵兵三千又敗之俘獲甚衆生

擒賊首以獻帥府嘉其功以奴婢百牛三十賞之時覲吉補敗于恩州之境吾里補復以兵四千往救之破敵萬餘宋兵十萬在單父間總管宗室移刺屋選步卒一萬騎兵四千往討之吾里補領其親管謀克以從遇敵先登力戰有功大軍經略密州吾里補將兵二千爲前鋒遇敵萬人于高密遂敗其衆追至城下殺戮殆盡獲馬牛三千餘吾里補與孛太欲敗賊王義軍十餘萬于州南是夜賊兵數千來襲營吾里補以兵橫擊走之後從大軍攻楚揚通泰等州天眷二年襲其父世襲猛安授寧遠大將軍皇統七年益以親管謀克天德三年除同知歸德尹正隆初爲唐古部族節度使大定二年爲保大軍節度使是歲改鎮通遠是時宋軍十萬餘人阿隴據險要攻郡邑元帥左都監合喜奏益兵詔益兵七千遣吾里補與彰化軍節度使宗室璋等七人偕往以備任使進階龍虎衛上將軍卒于軍中

蕭恭字敬之乃烈奚王之後也父翊天輔間歸朝從攻興中遂以爲興中尹師還以恭爲質子宗望伐宋翊當領建興成川懿五州兵爲萬戶軍帥以恭材勇

使代其父行時年二十三至中山宋兵出戰恭先以所部擊敗之經山東及渡淮襲康王皆在軍中師還帥府承制授德州防禦使奚人之屯濱棣間者皆隸焉改棣州防禦使皇統間改同知橫海軍節度使丁父憂起復爲太原少尹用廉遷同知中京留守事累遷兵部侍郎授世襲謀克坐問禁中起居狀決杖奪一官貞元二年爲同知大興尹歲餘遷兵部尙書爲宋國生日使以母憂去官起復爲侍衛親軍馬步軍都指揮使四年遷光祿大夫復爲兵部尙書是歲經畫夏國邊界還過臨潼失所佩金牌至太原憂恚成疾時已具其事驛聞於朝海陵復命給之仍遣諭恭曰汝失信牌亦猶不謹朕方俟汝欲有委使乃稱疾耶必以去日身佩信牌歸則無以爲辭欲朕先知耳使至恭已疾篤稽顙受命俄頃而卒海陵方遣使與其子護衛九哥馳視乃戒府官使善護之至保州已聞訃矣海陵深悼惜之命九哥護喪以還所過州府設奠喪至都命百官致祭親臨奠賻贈甚厚并賜廐馬一謂九哥曰爾父銜命卒於道途甚可悼惜朕乘此馬十年今賜汝父可常控至柩前旣葬汝則乘之

完顏習不主年十六從伐宋攻下懷仁縣功居最從睿宗經略陝西以兵七百人入丹州諸山遇盜三千擊敗之又破賊四千生擒其將帥出隴州以兵四百擊敗數千宋兵七千來取鞏州復擊走之又以五千兵敗吳玠之衆三萬白塔口遇敵五千復敗之別降定遠等寨皇統二年授同知臨洮尹以憂去官未期以舊職起復改孟州防禦使遷臨洮尹復以罪罷正隆三年起爲京兆尹改河南尹卒年五十八

紇石烈胡刺晦發川唵敦河人徙西北路識契丹字爲帥府小吏梁王宗弼復陝西久不通問睿宗在燕京遣胡刺往候之是時宗弼自鳳翔攻和尚原使胡刺視彼中地形修道築城十二年往濱州密訪南邊事體及觀劉豫治齊狀盡得其虛實睿宗甚嘉之皇統初從宗弼渡淮及下廬和二州大破張浚韓世忠等軍遣胡刺馳奏賞以金盃重彩五端絹五匹七年授同知景州軍州事以廉加忠武校尉天德初以監察御史分司行臺歷同知濟州防禦使事入爲監察御史秩滿再任大定二年遷刑部員外郎與御史大夫白彥敬往西北部族市

馬累轉泗州防禦使三遷蒲與路節度使移寧昌軍卒

耶律恕字忠厚本名耨里遼橫帳秦王之族也爲人謹愿有志喜讀書通契丹大小字與耶律高八來歸婁室問高八曰與爾同來者誰可任用治軍旅事高八對曰耨里可婁室與宗翰伐宋恕隸前鋒取和尚原攻仙人關特爲睿宗所知再除太原真定少尹撒离喝辟署陝西參謀委以軍務遷行臺兵部侍郎再遷尙書左司郎中海陵爲平章政事謂恕曰君亦有黨乎恕正色曰窮則獨善其身達則兼善天下不以其道得之非恕之志也何朋黨之有海陵徐曰前言戲之耳久之爲沁南軍節度使遷行臺工部尙書行臺罷改安國軍節度使爲參知政事以疾求解爲興中尹入爲太子少保正隆元年致仕封廣平郡王薨年六十九二年例贈銀青光祿大夫

郭企忠字元弼唐汾陽王子儀之後郭氏自子儀至承勳皆節鎮北方唐季承勳入于遼子孫繼爲天德軍節度使至昌金降爲副使企忠幼孤事母孝謹年十三居母喪哀毀如成人服除襲父官加左散騎常侍天輔中大軍至雲中遣

耶律坦招撫諸部企忠來降軍帥命同勾當天德軍節度使事徙所部居于韓州及見太祖問知其家世禮遇優厚以白鷹賜之天會三年伐宋領西南諸部番漢軍兵爲猛安從破鴈門屯兵加桂州管內觀察留後鎮代州明年賊楊麻胡等聚衆數千于五臺企忠與同知州事迪里討平之遷知汾州事是時汾州初下居民多爲軍士掠去城邑蕭然企忠詣帥府力請願聽其親舊贖還帥府從之未幾完實如故石州賊閻先生衆數萬至城下僚屬慮有內變請爲備企忠曰吾於汾人有德保無他乃率吏民城守會援至合擊破之六年改靜江軍節度留後遷天德軍節度使汴京步軍都指揮使累遷金吾衛上將軍秩滿權沁州刺史到官歲餘卒年六十八

烏孫訛論善騎射襲父撒改謀克從蒙刮攻東京及廣寧擊北京山賊皆有功蕭霸哲來攻恩州訛論以六十騎偵之逮夜遇敵數百騎掩擊之生獲三人知霸哲衆九萬且至故蒙刮得以爲備遂破霸哲宗望伐宋已至汴訛論破尉氏中牟援兵取其城久之以兵百五十人破敵一千於滄州西明年再伐宋蒙刮

戍開州訛論以騎四百守河復敗千餘人斬首七百餘宗弼渡淮阿里先具舟于江上聞王善兵扼其前宗弼使訛論濟師敗王善于和州北李成以兵七萬據烏江訛論帥二千人直前敗之宗弼遂渡江至江寧十五年沂州竇防禦叛訛論敗之獲竇防禦錄前後功授猛安加昭武大將軍宗弼再取河南訛論以五十騎敗楊家賊五百於徐州東以功受賞不可勝計天德二年除唐州刺史移淄州遷石壘部族節度使行至北京病卒

顏蓋門都隆州帕里千山人也身長美鬚髯天會間從其兄羊艾在軍中方取汴京其兄戰歿遂擐甲代其兄充軍睿宗定陝右以門都爲蒲輦隸監軍杲親管萬戶攻饒風關至坊州杲欲與總管蒲魯虎會於鳳翔遣門都領六十騎先往期會及還備得地形險阨賞銀五十兩其後梁王宗弼駐軍山東遣人詣陝西特召門都至令齎廢齊及安撫百姓詔書往諭監軍宗室杲門都既還宗弼賞以良馬銀絹事畢復遣從杲天眷初叛將定國軍節度使李世輔僞邀杲至私署以獻甲爲名遂以兵劫執而去門都突出以告押軍猛安完顏撻懶同率

兵追及首出與戰杲由此得脫以功遷明威將軍復從杲招復陝西進至鳳翔齊國初廢諸路多反覆不一杲授門都牌劄令往撫定門都所至多張甲兵從者安之違者討之帖然無復叛者杲甚嘉之皇統初遷廣威將軍四年授同知通遠軍節度使事改知保安軍事天德三年爲丹州刺史兼知軍事正隆初爲寧州刺史大定初宋將吳璘等以軍數十萬人據秦隴元帥府承制以門都爲勇烈軍都總官領軍討之宋人保據德順都監合喜遣武威軍副都總管夾谷查刺會宗室璋議征討之策璋與門都曰須都監親至敵必退矣合喜領軍四萬來赴遂復德順州明年秦隴平以功遷金吾衛上將軍授通遠軍節度使五年改慶陽尹兼本路兵馬都總管卒于官十九年錄功以子六哥世襲本路曷懶兀主猛安敵骨論窟申謀克授武功將軍門都性忠厚謹愨安置營壁尤能慎密有敵忽來雖矢石至前泰然自若迺號令士卒如平時由是人益安附而功易成焉

僕散渾坦蒲與路挾邁人也身長七尺勇健有力善騎射年十六從其父胡沒

速征伐初授脩武校尉爲宗弼扎也天眷二年與宋岳飛相拒渾坦領六十騎深入規伺至鄆陵敗宋護糧餉軍七百餘人多所俘獲皇統九年除慈州刺史再遷利涉軍節度使授世襲濟州和尤海鸞猛安涉里斡設謀克貞元初以憂去官起復舊職歷泰寧永定軍改咸平尹海陵殺渾坦弟樞密使忽土召渾坦至南京旣見沉思久之謂之曰汝有功舊不因忽土得官以此致罪甚可憐憫遂釋之改興平軍節度使世宗卽位以爲廣寧尹窩斡反爲行軍都統與曷懶路總管徒單克寧俱在左翼敗窩斡於長樂改臨潢尹賊平賜金帛改曷懶路兵馬都總管徙顯德軍慶陽尹致仕大定十二年上半年上思舊功起爲利涉軍節度使復以金紫光祿大夫致仕卒年七十二渾坦歷一十七官未嘗爲佐貳性沉厚有識雖未嘗學問明於聽斷所至有治聲云

鄭建充字仲實其先京兆人占籍鄜州仕宋累官知延安府事天會七年來降仍知延安府屯兵三千宋劉光烈兵八萬來攻建充相距四十餘日攻益急建充遣人會斜喝軍夾擊破之俘其裨將賀貴遷節制司統制軍馬改京兆府路

兵馬都監敗宋曲端於彭原高昌宗據延安爲宋守建充擊之盡復城邑復知
延安軍府事齊國建累遷博州團練使知寧州齊國廢朝廷以地賜宋爲宋環
慶路經略安撫副使仍知寧州天眷復取陝西仍以爲經略安撫使知慶州從
破甘谷城改平涼尹是時營建南京宮室大發河東陝西材木浮河而下經砥
柱之險筏工多沉溺有司不敢以聞乃誣以逃亡錮其家建充白其事請至砥
柱解筏順流散下令善游者下流接出之而錮者得釋正隆軍興括筋角造軍
器百姓往往椎牛取之或生拔取其角牛有泣下者建充白其事於朝建充性
剛暴常畜獠犬十數奴僕有罪旣笞已復嗾犬噬之骨肉都盡雖謙遜下士於
敵已上一無所屈省部文移有不應法度輒置之坐下或卽毀裂由是在位者
銜之軍胥李換竊用公帑自度不得免乃誣建充藏甲欲反更再鞫皆無狀方
奏上攝事者素與建充有隙恐其得釋使吏持文書給建充曰朝省有命奈何
建充曰惟汝所爲是夜死於獄中長子愬亦死焉

烏古論三合曷懶路愛也窟河人後徙真定睿宗爲右副元帥聞三合勇略選

充扎也後從宗弼征伐補麴院都監未幾從伐宋與宋兵遇於潁州三合先登破之皇統元年領漢軍千戶帥府再以軍四千隸焉除同知鄭州防禦使事再遷太子少詹事大定六年改洺州防禦使上曰卿昔事睿宗積勞苦遠事朕輔佐太子宣力多矣今典名郡所以勞卿也遷永定軍節度使歷臨潢鳳翔尹陝西路統軍使東平尹節制州郡躬行儉約政先寬簡邊庭久寧人民獲安召爲簽書樞密院事卒十八年世宗追錄三合舊勞授其子大興河北西路愛也窟河世襲猛安阿里門河謀克階武功將軍

移刺温本名阿撒遼橫帳人工契丹小字睿宗爲左副元帥伐宋温從大吳渡江辟江寧府都巡檢江寧太平初下宋遣諜人扇構百姓應者數萬人温擒其諜者遂不敢竊發宗弼嘉之賜銀千兩重綵百端絹二百匹宗弼每出征伐未嘗不在行間除同知河北西路轉運使事會宗弼巡邊温從軍不之官宗弼入朝熙宗宴羣臣宗弼欲有奏請已被酒失次温掖而出宮明日熙宗謂宗弼曰阿撒事叔甚謹不可去左右由是宗弼益親信之嘗謂女婿紇石烈志寧曰汝

可效阿撒之爲人也可以幾古人矣未幾除同知中京路都轉運使事累遷左
諫議大夫兼脩起居注正隆伐宋以本官爲濟州路行軍萬戶從至揚州軍還
除同知宣徽院事世宗御饌不適口召温嘗之奏曰味非不美也蓋南北邊事
未息聖慮有所在耳上意遂釋歷永定震武崇義節度使移臨海軍州治近水
秋雨水潦暴至城下城頗決百姓惶駭不知所爲温躬督役夫繕完之雖臨不
測無所避僚屬或止温温曰爲政疵癘水泛盜爲災守臣之罪當以此身爲百
姓謝雖死不恨移鎮武定歲旱且蝗温割指以血瀝酒中禱而酹之旣而雨露
足有羣鴉啄蝗且盡由是歲熟人以爲至誠之感云以老致仕卒

贊曰軍旅之事鋒鏑在前不計其死耳屬金鼓目屬旌旗心屬號令此行列之
任也自收國用兵至於大定和宋以前用命之士雖細必錄所以明功也

蕭仲恭本名尤里者祖撻不也仕遼爲樞密使守司徒封蘭陵郡王父特末爲
中書令守司空尙主仲恭性恭謹動有禮節能被甲超橐駝遼故事宗戚子弟
別爲一班號孩兒班仲恭嘗爲班使歷宮使本班詳穩遼帝西奔天德仲恭爲

護衛太保兼領軍事至霍里底泊大軍奄至倉卒走仲恭母馬乏不能進謂仲恭兄弟曰汝等盡節國家無以我爲也仲恭母遼道宗季女也遼王傷之命弟仲宣留侍其母仲恭從而西時大雪寒甚遼主乏食仲恭進衣并進乾糲遼主困仲恭伏冰雪中遼主藉之以憩凡六日乃至天德始得食後與遼主俱獲太宗以仲恭忠於其主特加禮待天會四年仲恭使宋且還宋人意仲恭耶律余睹皆有亡國之感而余睹爲監軍有兵權可誘而用之乃以蠟丸書令仲恭致之余睹使爲內應仲恭素忠信無反覆志但恐宋人留不遣遂陽許還見宗望卽以蠟丸書獻之宗望察仲恭無他薄罰之於是再舉伐宋執二帝以歸累遷右宣徽使改都點檢宗磐與宗幹爭辯於熙宗前宗磐拔刀向宗幹仲恭呵之乃止旣而宗磐以反罪誅仲恭衛禁有備以功加銀青光祿大夫遷尙書右丞皇統初封蘭陵郡王授世襲猛安進拜平章政事同監修國史封濟王詔葬遼豫王於廣寧仲恭請往會葬熙宗義而許之改行臺左丞相居無何入爲尙書右丞相拜太傅領三省事封曹王天德二年封越國王除燕京留守海陵親爲

書以玉山子賜之是歲薨年六十一諡貞簡正隆例降王爵改儀同三司鄭國公子拱

拱本名迪輦阿不初爲蘭子山猛安海陵爲宰相徼取人譽薦大臣子以爲達官遂以拱爲禮部侍郎耶律彌勒拱妻女弟也海陵將納爲妃使拱自汴取之還過燕是時仲恭爲燕京留守見彌勒身形不類處子竊憂之曰上多猜嫌拱其及禍矣拱去不數日仲恭卒拱至上京聞訃以本官起復佩信牌往燕京治葬事未行彌勒入宮果如仲恭所相度卽遣出宮夜半召拱至禁中詰問無狀海陵終疑之乃罷拱禮部侍郎奪其信牌拱待命踰年不報歸蘭子山治猛安事是時蕭恭張九坐語禁中事得罪拱至蘭子山與客會語及之有阿納與拱有隙乃誣拱言張九無罪被誅語涉怨謗海陵遣使鞫之戒傳者曰此子狂妄宜有此語不然彼中安得知此事使者不復問拱但榜掠其左驗使如告語證之拱遂見殺

仲宣本名野里補仲恭母弟聰敏好學沉厚少言五歲遙授郡刺史累加太子

少師爲本班詳穩從天祚西爲護衛太保左右班詳穩至石輦鐸遼主留仲宣侍母遂與其母皆見獲太宗嘉之且謂仲宣能知遼國故事命權宣徽使從睿宗伐康王師還家居者久之皇統二年特授鎮國上將軍歷順義永定昭義武寧四鎮節度使爲政平易小吏不敢爲姦賄賂禁絕奴婢入郡人莫識其面朔潞百姓皆爲立祠刻石頌之正隆二年卒年六十四

高松本名檀朵澄州析木人年十九從軍爲蒲輦有力善戰宗弼聞其名召置左右從破汴京及和尚原累官咸平總管府判官世宗卽位充管押東京路渤海萬戶兵部尙書可喜謀反前同知延安尹李老僧曰我與萬戶高松謀之必從我矣衆曰若得此軍舉事易矣老僧往見松說松曰君有功舊人至今不得大官何也松曰我一縣令也每念聖恩累世不能報尙敢有望乎老僧遂不敢言可喜布輝阿瑣知事不可成遂上變共捕斡論赴有司松從征窩斡以功遷咸平少尹四遷崇義軍節度使卒年七十四

贊曰忠信行己豈不大哉蕭仲恭盡心故主而富貴福澤嚮之與宗室舊臣等

矣仲恭廷叱宗磐而朝廷尊高松誼遏李老僧而社稷安皆有古烈丈夫之風焉

海陵后徒單氏生太子光英元妃大氏生崇王元壽柔妃唐括氏生宿王矧思阿補才人南氏生滕王廣陽

光英本名阿魯補徒單后所生是時燕京轉運使趙襲慶多男故又名曰趙六養于同判大宗正方之家故崇德大夫沈璋妻張氏嘗爲光英保母於是贈璋銀青光祿大夫賜宗正方錢千萬天德四年二月立光英爲皇太子是月安置太祖畫像于武德殿盡召國初嘗從太祖破寧江州有功者得百七十六人並加宣武將軍賜酒帛其中有忽里罕者解其衣進光英曰臣今年百歲矣有子十人願太子壽考多男子與小臣等海陵使光英受其衣海陵卽以所服并佩刀賜忽里罕答其厚意後以英字與鷹隼字聲相近改鷹坊爲馴鷺坊國號有英國又有應國遂改英國爲壽國應國爲杞國宋亦改光州爲蔣州光山縣爲期思縣光化軍爲通化軍云太醫院保全郎李中保和大夫薛遵義俱以醫藥

侍光英李中超換宣武將軍太子左衛副率薛遵義丁憂起復宣武將軍太子右衛副率光英襁褓時養于宗正方家其後養于永寧宮及徒單斜也家貞元元年詔朝官京官五品以下奉引自通天門入居于東宮正隆元年三月二十七日光英生日宴百官于神龍殿賜京師大酺一日四年八月光英射鴉獲之海陵大喜命薦原廟賜光英馬一匹黃金三斤班賜從者有差正隆六年海陵行幸南京次安肅州光英獲二兔遣使薦于山陵居數日復獲麀兔從官皆稱賀賜光英名馬弓矢復遣使薦于山陵六月海陵至南京羣臣迎謁海陵與徒單后光英共載而入海陵嘗言俟太子年十八以天下付之朕當日遊宴於宮掖苑囿中以自娛樂光英頗警悟海陵謂侍臣曰上智不學而能中性未有不由學而成者太子宜擇碩德宿學之士使輔導之庶知古今防過失詩文小技何必作耶至於騎射之事亦不可不習恐其懦弱也及將親征后與光英挽衣號慟海陵亦泣下曰吾行歸矣後誦孝經一日忽謂人曰經言三千之罪莫大於不孝何爲不孝對者曰今民家子博奕飲酒不養父母皆不孝也光英默然

良久曰此豈足爲不孝耶蓋指言海陵弑母事及伐宋光英居守以陔滿訛里也爲太子少師兼河南路統軍使以衛護之完顏元宜軍變海陵遇害都督府移文訛里也殺光英于汴京死時年十二後與海陵俱葬于大房山諸王墓次訛里也咸平路窟吐忽河人襲其父忽土猛安除邳州刺史三遷昌武軍節度使歸德尹南京留守河南路統軍使太子少師大定二年遷元帥右都監宋人陷陳蔡訛里也師久無功已而兵敗于宋解職俄起爲京兆尹世宗謂之曰卿爲河南統軍門多私謁百姓惡之其後經略陳蔡不惟無功且復致敗以汝舊勞故復用汝京兆地近南邊宜善理之大定三年卒

元壽天德元年封崇王三年薨

矧思阿補正隆元年四月生小底東勝家保養之賜東勝錢千萬仍爲起第五月己酉彌月封其母唐括氏爲柔妃賜京師貧者五千人錢人錢二百二年矧思阿補生日海陵與永壽太后及皇后太子光英幸東勝家三年正月五日矧思阿補薨海陵殺太醫副使謝友正醫者安宗義及其乳母杖東勝一百除名

明日追封矧思阿補爲宿王葬大房山諫議大夫楊伯雄入直禁中因與同直者相語伯雄曰宿王之死蓋養于宮外供護雖謹不若父母膝下豈國家風俗素尙如此或以此言告海陵海陵大怒謂伯雄曰爾臣子也君父所爲豈得言風俗宮禁中事豈爾當言朕或體中不佳間不視朝祇是少得人幾拜耳而庶事皆奏決便殿縱有死刑不卽論決蓋使囚者得緩其死至於除授宣勅雖復稽緩有何利害朕每當閒暇頗閱教坊聲樂聊以自娛書云內作色荒外作禽荒酣酒嗜音峻宇雕牆有一於此未或不亡此戒人君不恤國事溺於此者耳如我雖使聲樂喧動天地宰相敢有濫與人官而吏敢有受賂者乎外間敢有竊議者乎爾諫官也有可言之事當公言之言而不從朕之非也而乃私議可乎伯雄對曰陛下至德明聖固無竊議者愚臣失言罪當萬死惟陛下哀憐海陵曰本欲殺汝今祇杖汝二百旣決杖至四十使近臣傳詔諭伯雄曰以爾藩邸有舊今特釋之

滕王廣陽母南氏本大臬家婢隨元妃大氏入宮海陵幸之及有娠卽命爲殿

直正隆二年九月二十六日生廣陽十月滿月海陵分施在京貧民凡用錢千貫三年二月封南氏為才人七月封廣陽為滕王九月薨

贊曰海陵伐宋光英居守使陔滿訛里也以官師兼統軍之任計至悉也豈料死其手乎荀首有言不以人子吾子其可得耶海陵晚人之子不翅魚肉而獨己子之謀安不可得矣

金史卷八十二

金史卷八十二 海陵當開建國元年... 贊曰海陵伐宋光英居守使陔滿訛里也以官師兼統軍之任計至悉也豈料死其手乎荀首有言不以人子吾子其可得耶海陵晚人之子不翅魚肉而獨己子之謀安不可得矣

金史卷八十三

元中書右丞相總裁脫脫等修

列傳第二十一

張通古

張浩

張汝霖

張玄素

張汝弼

耶律安禮

納合椿年

祁宰

張通古字樂之易州易縣人讀書過目不忘該綜經史善屬文遼天慶二年進士第補樞密院令史丁父憂起復懇辭不獲因遜去屏居興平太祖定燕京割以與宋宋人欲收人望召通古通古辭謝隱居易州太寧山下宗望復燕京侍中劉彥宗與通古素善知其才召為樞密院主奏改兵刑房承旨天會四年初建尙書省除工部侍郎兼六部事高慶裔設磨勘法仕宦者多奪官通古亦免去遼王宗幹素知通古名惜其才遣人諭之使自理通古不肯曰多士皆去而已何心獨求用哉宗幹為論理之除中京副留守為詔諭江南使宋主欲南面使通古北面通古曰大國之卿當小國之君天子以河南陝西賜之宋宋約奉

表稱臣使者不可以北面若欲貶損使者使者不敢傳詔遂索馬欲北歸宋主遽命設東西位使者東面宋主西面受詔拜起皆如儀使還聞宋已置戍河南謂送伴韓肖胄曰天子裂壤地益南國南國當思圖報大恩今輒置守戍自取嫌疑若與師問罪將何以爲辭江左且不可保況齊乎肖胄惶恐曰敬聞命矣卽馳白宋主宋主遽命罷戍通古至上京具以白宗幹且曰及其部置未定當議收復宗幹喜曰是吾志也卽除參知行臺尙書省事未幾詔宗弼復取河南通古請先行至汴諭之比至汴宋人已去矣或謂通古曰宋人先退詐也今聞將自許宿來襲我通古曰南人宣言來者正所以走耳迺使人覘之宋人果潰去宗弼撫髀笑曰誰謂書生不能曉兵事哉河南卒孫進詐稱皇弟按察大王謀作亂是時海陵爲相內懷覬覦欲先除熙宗弟胙王常勝因孫進稱皇弟大王遂指名爲胙王以誣構之熙宗自太子濟安薨後繼嗣未定深以爲念裴滿后多專制不得肆意後宮頗鬱鬱因縱酒往往迷惑妄怒手刃殺人及海陵中傷胙王熙宗以爲信然不疑遣護衛特思就汴京鞠治行臺知熙宗意在胙王

導引孫進連屬之通古執其咎極力辯止及孫進引服蓋假託名稱將以惑衆
規取財物耳實無其人也特思奏狀海陵譖之曰特思且將徼福於胙王熙宗
益以海陵爲信遂殺胙王并特思殺之行臺諸人乃責通古曰爲君所誤今坐
死矣通古曰以正獲罪死賢於生海陵旣殺胙王不復緣害他人由是坐止特
思行臺不坐天德初遷行臺左丞進拜平章政事封譚王改封鄆王以疾求解
機務不許拜司徒封瀋王海陵御下嚴厲收威柄親王大臣未嘗少假以顏色
惟見通古必以禮貌會磁州僧法寶欲去張浩張暉欲留之不可得朝官又有
欲留之者海陵聞其事詔三品以上官上殿責之曰聞卿等每到寺僧法寶正
坐卿等皆坐其側朕甚不取佛者本一小國王子能輕舍富貴自苦修行由是
成佛今人崇敬以希福利皆妄也況僧者往往不第秀才市井游食生計不足
乃去爲僧較其貴賤未可與簿尉抗禮閭閻老婦迫於死期多歸信之卿等位
爲宰輔乃復效此失大臣體張司徒老成舊人三教該通足爲儀表何不師之
召法寶謂之曰汝旣爲僧去住在己何乃使人知之法寶戰懼不知所爲海陵

曰汝爲長老當有定力今乃畏死耶遂於朝堂杖之二百張浩張暉杖二十正隆元年以司徒致仕進封曹王是年薨年六十九通古天資樂易不爲表襮雖居宰相自奉如寒素焉子沉天德三年賜楊建中榜及第

張浩字浩然遼陽渤海人本姓高東明王之後曾祖霸仕遼而爲張氏天輔中遼東平浩以策干太祖太祖以浩爲承應御前文字天會八年賜進士及第授祕書郎太宗將幸東京浩提點繕修大內超遷衛尉卿權簽宣徽院事管勾御前文字初定朝儀求養親去職起爲趙州刺史官制行以中大夫爲大理卿天眷二年詳定內外儀式歷戶工禮三部侍郎遷禮部尙書田穀黨事起臺省一空以浩行六部事簿書叢委決遣無留人服其才以疾求外補除彰德軍節度使遷燕京路都轉運使俄改平陽尹平陽多盜臨汾男子夜掠人婦浩捕得榜殺之盜遂衰息近郊有淫祠郡人頗事之廟祝田主爭香火之利累年不決浩撤其祠屋投其像水中強宗黠吏屏迹莫敢犯者郡中大治乃繕葺堯帝祠作擊壤遺風亭海陵召爲戶部尙書拜參知政事天德二年丁母憂起復參知政

事進拜尙書右丞天德三年廣燕京城營建宮室浩與燕京留守劉筈大名尹盧彥倫監護工作命浩就擬差除旣而暑月工役多疾疫詔發燕京五百里內醫者使治療官給藥物全活多者與官其次給賞下者轉運司舉察以聞貞元元年海陵定都燕京改燕京爲中都改析津府爲大興府浩進拜平章政事賜金帶玉帶各一賜宴于魚藻池浩請凡四方之民欲居中都者給復十年以實京城從之拜尙書右丞相兼侍中封潞王賜其子汝霖進士及第未幾改封蜀王進拜左丞相正隆二年改封魯國公表乞致仕海陵曰人君不明諫不行言不聽則宰相求去宰相老病不能任事則求去卿於二者何居浩對曰臣羸病不堪任事宰相非養病之地也是以求去不許海陵欲伐宋將幸汴而汴京大內失火於是使浩與敬嗣暉營建南京宮室浩從容奏曰往歲營治中都天下樂然趨之今民力未復而重勞之恐不似前時之易成也不聽浩朝辭海陵問用兵利害浩不敢正諫乃婉詞以對欲以微止海陵用兵奏曰臣觀天意欲絕趙氏久矣海陵愕然曰何以知之對曰趙構無子樹立疎屬其勢必生變可不

煩用兵而服之海陵雖喜其言而不能從也浩至汴海陵時時使宦者梁琬來視工役凡一殿之成費累鉅萬琬指曰某處不如法式輒撤之浩不能抗而與之均禮汴宮成海陵自燕來遷居之浩拜太傅尚書令進封秦國公海陵至汴累月不視朝日治兵南伐部署諸將浩欲奏事不得見會海陵遣周福兒至浩家浩附奏曰諸將皆新進少年恐誤國事宜求舊人練習兵者以爲千戶謀克而海陵部署已定惡聞其言乃杖之海陵自將發汴京皇后太子居守浩留治尚書省事世宗卽位于遼陽揚州軍變海陵遇害都督府使使殺太子光英于南京浩遣戶部員外郎完顏謀衍上賀表明年二月浩朝京師入見世宗謂曰朕思天位惟艱夙夜惕懼不遑寧處卿國之元老當戮力贊治宜令後世稱揚德政毋失委任之意也俄拜太師尚書令封南陽郡王世宗曰卿在正隆時爲首相不能匡救惡得無罪營建兩宮殫竭民力汝亦嘗諫故天下不以咎汝惟怨正隆而卿在省十餘年練達政務故復用卿爲相當自勉毋負朕意浩頓首謝居數日世宗謂浩曰卿爲尚書令凡人材有可用者當舉用之浩舉紇石烈

志寧等其後皆爲名臣浩有疾在告者久之遣左司郎中高衍及浩姪汝弼宣諭浩力疾入對卽詔入朝毋拜許設座殿陛之東若有咨謀然後進對或體中不佳不必日至省中大政可就第裁決浩雖受詔然每以退爲請三年夏復申前請乃除判東京留守疾不能赴任因請致仕初近侍有欲罷科舉者上曰吾見太師議之浩入見上曰自古帝王有不用文學者乎浩對曰有曰誰歟浩曰秦始皇上顧左右曰豈可使我爲始皇乎事遂寢是歲薨上輟朝一日詔左宣徽使趙興祥率百官致奠賻銀千兩重綵五十端絹五百匹謚曰文康明昌五年配享世宗廟庭泰和元年圖像衍慶宮子汝霖汝能汝方汝猷

汝霖字仲澤少聰慧好學浩嘗稱之曰吾家千里駒也貞元二年賜呂忠翰榜下進士第特授左補闕擢大興縣令再遷禮部員外郎翰林待制大定八年除刑部郎中召見於香閣諭之曰卿以待制除郎中勿以爲降朕以刑部闕漢官故以授卿且卿入仕未久姑試其能耳如職事修舉當有陞擢爾父太師以戶部尙書升諸相位由崇德大夫躡遷金紫卿所目見也當旣厥心無忝乃父明

年授太子左諭德兼禮部郎中先是知登聞檢院王震改禮部郎中世宗諭宰
臣曰此除未允人望禮官當選有學術士如張汝霖者可也於是命汝霖兼之
而除震別職擢刑部侍郎以憂解起復爲太子詹事遷太子少師兼御史中丞
世宗召謂曰卿嘗言監察御史所察州縣官多因沽買以得名譽良吏奉法不
爲表襮必無所稱朕意亦然卿今爲臺官可革其弊尋改中都路都轉運使太
子少師兼禮部尚書俄轉吏部爲御史大夫時將陵主簿高德温大收稅戶米
逮御史獄汝霖具二法上世宗責之曰朕以卿爲公正故登用之德温有人在
宮掖故朕頗詳其事朕肯以宮掖之私撓法耶不謂卿等顧徇如是汝霖跪謝
久之上顧左諫議大夫楊伯仁曰臺官不正如此伯仁奏曰罪疑惟輕故具二
法上請在陛下裁斷耳且人材難得與其材智而邪不若用愚而正者上作色
曰卿輩皆愚而不正者也未幾復坐失出大興推官高公美罪謫授棣州防禦
使頃之復爲太子少師兼禮部尚書拜參知政事太子少師如故是日汝霖兄
汝弼亦進拜尚書左丞時人榮之後因朝奏日論事上前世宗謂曰朕觀唐史

見太宗行事初甚厲精晚年與羣臣議多飾辭朕不如是也又曰唐太宗明天子也晚年亦有過舉朕雖不能比迹聖帝明王然常思始終如一今雖年高敬慎之心無時或怠汝霖對曰古人有言靡不有初鮮克有終有始有卒者其惟聖人乎魏徵所言守成難者正謂此也上以爲然二十五年章宗以原王判大興府事上命汝霖但涓視事日且加輔導尋坐擅支東宮諸皇孫食料奪官一階久之遷尙書右丞是時世宗在位久熟悉天下事思得賢材與圖致治而大臣皆依違苟且無所薦達一日世宗召宰臣謂曰卿等職居輔相曾無薦舉何也且卿等老矣殊無可以自代者乎惟朕嘗言某人可用然後從而言之卿等旣無所言必待朕知而後進用將復有幾因顧汝霖曰若治丞者亦因右丞相言而知也汝霖對曰臣等苟有所知豈敢不薦但無人耳上曰春秋諸國分裂土地褊小皆稱有賢今天下之大豈無人才但卿等不舉而已今朕自勉庶幾致治他日子孫誰與共治乎汝霖等皆有慚色二十八年進拜平章政事兼修國史封芮國公世宗不豫與太尉徒單克寧右丞相襄同受顧命章宗卽位加

銀青榮祿大夫進封莘先是右丞相襄言熙宗聖節蓋七月七日爲係景祖忌辰更用五月受外國賀今天壽節在七月雨水淫暴外方人使赴闕有礙行李乞移他月爲便汝霖言帝王之道當示信於天下昔宋主構生日亦係五月是時都在會寧上國遣使賜禮不聞有霖潦礙阻之說今與宋構好日久遽以暑雨爲辭示以不實萬一雨水踰常愆期到闕猶愈更用別日參知政事劉瑋御史大夫唐括貢中丞李晏刑部尙書兼右諫議大夫完顏守道修起居注完顏烏者同知登聞檢院事孫鐸亦皆言其不可帝初從之旣而竟用襄議時帝在諒陰初出獵諫院聯章言心喪中未宜其後冬獵汝霖諫之詔答曰卿能每事如此朕復何憂然時異事殊難同古昔如能斟酌得中斯爲當矣一日帝謂宰臣曰今之用人太拘資歷如此何能得人汝霖奏曰不拘資格所以待非常之材帝曰崔祐甫爲相未踰年薦八百人豈皆非常材耶時有司言民間收藏制文恐因而滋訟乞禁之汝霖謂王者之法譬猶江河欲使易避而難犯本朝法制坦然明白今已著爲不刊之典天下之人無不聞誦若令私家收之則人皆

曉然不敢爲非亦助治之一端也不禁爲便詔從之明昌元年三月表乞致仕不許十二月卒時帝獵饒陽計聞勅百官送葬賻禮加厚諡曰文襄汝霖通敏習事凡進言必揣上微意及朋附多人爲說故言不忤而似忠也初章宗新卽位有司言改造殿庭諸陳設物日用繡工一千二百人二年畢事帝以多費意輟造汝霖曰此非上服用未爲過侈將來外國朝會殿宇壯觀亦國體也其後奢用浸廣蓋汝霖有以導之云

張玄素字子貞與浩同曾祖祖祐父匡仕遼至節度使玄素初以蔭得官高永昌據遼陽玄素在其中翰魯軍至乃開門出降特授世襲銅州猛安天會間歷西上閣門使客省使東宮計司天眷元年以靜江軍節度使知涿州察廉最進官一階皇子魏王道濟遙領中京以玄素爲魏王府同提點尋改鎮西軍節度使遷東京路都轉運使改興平軍節度使正隆末年天下盜起玄素發民夫增築城郭同僚諫止之不聽未幾寇掠鄰郡皆無備而興平獨安世宗卽位玄素來見于東京玄素在東京希海陵旨言世宗嘗取在官黃糧及撫其數事至是

來見世宗一切不問玄素與李石力言宜早幸燕京上深然之遷戶部尚書出鎮定武遂致仕年八十四卒玄素厚而剛毅人畏憚之往往以片紙署字其上治瘡疾輒愈人皆異之

汝弼字仲佐父玄徵彰信軍節度使玄素之兄也汝弼初以父蔭補軍正隆二年中進士第調瀋州樂郊縣主簿玄徵妻高氏與世宗母貞懿皇后有屬世宗納玄徵女爲次室是爲元妃張氏生趙王允中世宗卽位于遼陽汝弼與叔玄素俱往歸之擢應奉翰林文字世宗御翠巒閣召左司郎中高衍及汝弼問曰近日除授外議何如宜以實奏毋少隱也有不可用者當改之衍汝弼皆無以對自皇統以來內藏諸物費用無度吏竄緣爲姦多亡失汝弼與宮籍直長高公穆入殿小底王添兒閱實之以類爲籍作四庫以貯之於是內藏庫使王可道等皆杖一百汝弼等各進階頃之兼修起居注轉右司員外郎母憂去官起復吏部郎中累遷吏部尚書拜參知政事詔徙女直猛安謀克于中都給以近郊官地皆墾薄其腴田皆豪民久佃遂專爲己有上出獵猛安謀克人前訴所

給地不可種藝詔拘官田在民久佃者與之因命汝弼議其事請條約立限令百姓自陳過限許人首告實者與賞上可其奏仍遣同知中都轉運使張九思拘籍之上問高麗夏皆稱臣使者至高麗與王抗禮夏王立受使者拜何也左丞襄對曰故遼與夏爲甥舅夏王以公主故受使者拜本朝與夏約和用遼故禮所以然耳汝弼曰誓書稱一遵遼國舊儀今行之已四十年不可改也上曰卿等言是也上聞尙書省除授小官多不稱職召汝弼至香閣謂之曰他宰相年老卿等宜盡心汝弼對曰材薄不足以副聖意耳進拜尙書右丞於是戶部糴官倉粟汝弼請使暖湯院得糴之上讓曰汝欲積陰德邪何區區如此左丞相徒單克寧得解政務爲樞密使是日汝弼亦懷表乞致仕上使人止之曰卿年未老未可退也進左丞與族弟參知政事汝霖同日拜族里以爲榮有年未六十而乞致仕者上不許汝弼曰聖旨嘗許六十致仕上責之曰朕嘗許至六十者致仕不許未六十者且朕言六十致仕是則可行否則當言卿等不言皆此類也久之坐擅增諸皇孫食料與丞相守道右丞粘割斡特剌參政張汝霖

各削官一階上曰准法當解職但示薄責耳汝弼在病告上謂宰相曰汝弼久居執政練習制度頗能斟酌人材而用心不正乃罷爲廣寧尹賜通犀帶汝弼爲相不能正諫上所欲爲則順而導之所不欲爲則微言以觀其意上責之則婉辭以引過終不忤之也而上亦知之且贖貨以計取諸家名園甲第珍玩奇好士論薄之二十七年薨汝弼既與永中甥舅陰相爲黨章宗卽位汝弼妻高氏每以邪言怵永中覲非望畫永中母像侍奉祈祝使術者推算永中有司鞠治高氏伏誅事連汝弼上以事覺在汝弼死後得免削奪

耶律安禮本名納合系出遙輦氏幼孤事母以孝聞遼季間關避難未嘗一日怠溫清入朝當路者重其行義使主帥府文字授左班殿直天眷初從元帥於山西母喪不克歸葬主帥憐之賻禮甚厚安禮冒大暑挽柩行千餘里哀毀骨立行路嗟歎服除由行臺吏禮部主事累遷工部侍郎改左司郎中天德間罷行臺尙書省入爲工部侍郎累遷本部尙書明年冬爲宋國歲元使被詔治鞠韓王亨獄于廣寧亨無反狀安禮還奏海陵怒疑安禮梁王宗弼故吏乃責安

禮曰亨迭有三罪其論阿里出虎有誓券不當死既引伏其謂不足進馬及密遣刺客二者安得無之汝等來奏欲測我喜怒以爲輕重耳乃遣安禮再往與李老僧同鞠之老僧由是殺亨于獄海陵猶謂安禮輒殺亨以絕滅事迹親戚得以不坐安禮之不附上刻下乃如此改吏部尙書護大房山諸陵工作拜樞密副使封譚國公遷尙書右丞進封邠國公轉左丞議降累朝功臣封爵密諫伐江南忤海陵意罷爲南京留守封溫國公安禮長於吏事廉謹自將從帥府再伐宋寶貨人口一無所取貴爲執政奴婢止數人皆有契券時議賢之薨年五十六

納合椿年本名烏野初置女直字立學官於西京椿年與諸部兒童俱入學最號警悟久之選諸學生送京師俾上京教授耶魯教之椿年在選中補尙書省令史累官殿中侍御史改監察御史海陵爲相薦爲右司員外郎編定新制海陵篡立以爲諫議大夫椿年有酒失海陵使之戒酒遂終身不復飲改祕書監修起居注授世襲猛安爲翰林學士兼御史中丞正隆初起上京諸猛安於中

都山東等路安置以勞賜玉帶閑廐馬奉遷山陵還爲都點檢賜今名拜參知政事海陵謂椿年曰如卿吏材甚難得復有如卿者乎椿年薦大理丞紇石烈婁室海陵以婁室爲右司員外郎未旬日海陵謂椿年曰吾試用婁室果如卿言惟賢知賢信矣婁室後賜名良弼有宰相才世宗時至左丞相號賢相焉正隆二年椿年薨海陵親臨哭之追封特進譚國公謚忠辯賻銀二千兩綵百端絹千匹錢千萬以長子參謀合爲定遠大將軍襲猛安次子合答爲忠武校尉及歸葬再賜錢百萬仍給道路費椿年有宰相才好推輓士類然頗營產業爲子孫慮冒占西南路官田八百餘頃大定中括檢田土百姓陳言官豪占據官地貧民不得耕種溫都思忠子長壽椿年子猛安參謀合等三十餘家凡冒占三千餘頃詔諸家除牛頭稅地各再給十頃其餘盡賦貧民種佃世頗以此譏椿年云

祁宰字彥輔江淮人宋季以醫術補官王師破汴得之後隸太醫累遷中奉大夫太醫使數被賞賚常感激欲自效海陵將伐宋宰欲諫不得見會元妃有疾

召宰診視既入見卽上疏諫其略言國朝之初祖宗以有道伐無道曾不十年蕩遼戡宋當此之時上有武元文烈英武之君下有宗翰宗雄謀勇之臣然猶不能混一區宇舉江淮巴蜀之地以遺宋人況今謀臣猛將異於曩時且宋人無罪師出無名加以大起徭役營中都建南京繕治甲兵調發軍旅賦役煩重民人怨嗟此人事之不修也間者晝星見於牛斗熒惑伏於翼軫己歲自刑害氣在揚州太白未出進兵者敗此天時不順也舟師水涸舳艫不繼而江湖島渚之間騎士馳射不可驅逐此地利不便也言甚激切海陵怒命戮於市籍其家產天下哀之綦戡宰壻也海陵疑奏疏戢爲之辭曰實不知也海陵猶杖戢召禁中諸司局官至咸德門諭以殺宰事明年世宗卽位於遼東四年詔贈資政大夫復其田宅章宗卽位詔訪其子忠勇校尉平定州酒監公史擢尙藥局都監泰和初詔定功臣諡尙書省掾李秉鈞上言事有宜緩而急若輕而重者名教是也伏見故贈資政大夫祁宰以忠言被誅慕義之士畫傷厥心世宗卽位贈之以官陛下錄用其子甚大惠也雖武王封比干之墓孔子譽夷齊之仁

何以異此而有司拘文以職非三品不在議諡之例臣竊疑之若職至三品方得請諡當時居高官食厚祿者不爲無人皆畏罪泐認曾不敢申一喙畫一策以爲社稷計卒使立名死節之士顧出於醫卜之流亦可以少愧矣臣以謂非常之人當以非常之禮待之乞詔有司特賜諡以旌其忠斯亦助名教之一端也制曰可下太常諡曰忠毅

贊曰異哉海陵之爲君也舞智御下而不卹焉君子仕於朝動必以禮然後免於恥張通古耶律安禮位不及張浩進退始終其賢遠矣浩無事不爲無役不從爲相最久用之厚遇之薄豈亦自取之邪海陵伐宋浩安禮位皆大臣一以婉辭一以密諫賢於不諫而已祁宰一醫流獨能極諫其後皆如所言海陵戕之足以成其百世之名耳納合椿年援引善類有君子風其死適在宋兵未舉之前然觀其好營產殖亦未必忘身徇國之士也祁宰卓乎不可及也夫

金史卷八十四

元中書右丞相總中裁脫脫等修

列傳第二十二

果本名撒离喝

釋留温敦思忠子乙迭

温敦兀帶

奔睹

高楨

白彥敬

張景仁

果本名撒离喝安帝六代孫泰州婆盧火之族胡魯補山之子雄偉有才略太祖愛之常在軍中及婆盧火為泰州都統宗族皆隨遷泰州撒离喝嘗為世祖養子獨得不遷仍居安出虎水宗翰宗望凡再克汴執宋二主北還宗望分遣諸將定河北左都監闍母攻下河間雄州李成棄城走撒离喝邀擊大破之雄州遂降睿宗經略山東留撒离喝于河上而真定境內有賊眾自稱元帥秦王撒离喝擊破其眾執而戮之從平陝西撒离喝徇地自渭以西降德順軍又降涇原路鎮戎軍進平熙河降甘泉等二堡遂取保川城明年同奔覲討平河外

隆寧洮安隴二寨并降下河及樂州至西寧盡降其都護官屬於是木波族長等皆迎降攻慶陽敗其拒者遂降其城慕洧以環州來降得城寨十三步騎一萬於是宗弼軍敗于和尚原上褒美撒离喝而戒勵宗弼睿宗已定陝西留兵屯衝要使撒离喝總之居無何請收劍外十三州與宋王彥之軍七千人遇于沙會灤敗之遂克金州連破吳玠諸軍于饒風關遂取真符縣取洋州入興元府敗吳玠兵于固鎮擒其兩將撒葛祝等破宋兵盡下諸砦及仙人關天會十四年爲元帥右監軍天眷二年宗弼復取河南撒离喝自河中出陝西旣至鳳翔擊走宋軍是時宋軍在京北西者甚衆諸將以暑雨欲駐軍且聞宋兵九萬會于涇州都元帥遣河南步卒來會軍撒离喝留諸將屯環慶獨以輕騎取涇州六月敗宋兵于涇州宋兵走渭州拔离速追擊大敗之未幾爲右副元帥皇統三年封應國公賜賚甚厚熙宗出獵賜具裝馬二命射于圍中加開府儀同三司將還軍命宰臣錢之海陵升蒲州爲河中府撒离喝爲河中尹左副元帥如故自陝西入朝因從容言曰唐建成不道太宗以義除之卽位之後力行善

政後世稱賢陛下以前主失德大義廢絕力行善政則如唐太宗矣海陵聞其言色變撒离喝亦悔其言既而進封國王從行官吏皆官賞之海陵念撒离喝久握兵在外頗得士心忌之以爲行臺左丞相兼左副元帥又恐不奉命陽尊以殊禮使係屬籍以玉帶璽書賜之撒离喝至汴詔諭行臺右丞相右副元帥撻不野無使撒离喝預軍事撒离喝不知每事輒爭之撻不野詭曰太師梁王以陝西事屬公以河南事屬撻不野今未嘗別奉詔命陝西之事撻不野固不敢干涉撻不野久在河南將帥畏而附之撒离喝始至勢孤爭之不得白於朝大臣知上旨報曰如梁王教及詔使至汴諭旨於撻不野使還撻不野獨有附奏撒离喝不得與聞人皆知海陵使撻不野圖之矣會海陵欲除遼王斜也子孫及平章政事宗義等元帥府令史遙設希海陵旨誣撒离喝父子謀反并平章宗義尙書謀里野等遙設學撒离喝手署及印文詐爲契丹小字家書與其子宗安從左都監奔覩上變封題作已經開拆者書紙隱約有白字作曾經水浸致字畫分明者稱御史大夫宗安於宮門外遺下此書遙設拾得之其書略

曰撻不野自來於我不好凡事常有隄防應是知得上意移刺補丞相於我不好若遲緩分毫猜疑必落他手也又曰阿渾每見此書約定月日教掃胡令史却寫白字書來有司鞫問宗安不服曰使真有此書我剖肌肉藏之猶恐漏泄安得於朝門下遺之有司掠笞楚毒宗安神色不變乃寘掃胡爐炭上掃胡不能堪自誣服宗安謂掃胡曰爾苦矣宗義被掠笞不能當亦自誣服曰我輩知不免矣不早決徒自苦宗安曰今雖無以自明九泉之下當有冤對吾終不能引屈竟不服而死使廝魯渾殺撒离喝于汴族其家而無寫書及傳書者主名有折哥者能契丹小字舊嘗從撒离喝特末者陝西舊將嘗以左副元帥事馳驛赴闕兩人者皆族誅撒离喝親屬坐是死者二十餘人潞王幹者孫耶魯侯撒离喝于汴廝魯渾執之耶魯曰願付有司若法當同坐雖死不恨廝魯渾亦殺之其家訟于朝海陵不問但賜錢二百萬奔覩遷元帥左監軍加開府儀同三司遙設爲同知博州事賜錢三百萬謂之曰爾無自比老人老人親告朕爾以告有司設有撒离喝黨人在其間敗吾事矣老人指蕭玉也蕭玉名老人故

云然遙設在博州數歲後與蕭裕謀反伏誅大定初詔復撒禹喝官爵三年追封金源郡王諡莊襄以郡王品秩官爲營葬十七年配享太宗廟庭

耨盪溫敦思本名乙剌補阿補斯水人太祖伐遼是時未有文字凡軍事當中覆而應密者諸將皆口授思忠思忠面奏受詔還軍傳致詔辭雖往復數千言無少誤及遼人議和思忠與烏林答贊謀往來專對其間號聞刺聞刺者漢語云行人也自收國元年正月遼人遣僧家奴來使者三往反議不決使者賽刺至遼遼人殺之遼主自將至駝門大敗歸復遣使議和太祖使胡突哀往書曰若不從此胡突哀但使人送至界上或如賽刺殺之惟所欲者天輔三年六月遼大冊使太傅習泥烈以冊璽至上京一舍先取冊文副錄閱視文不稱兄不稱大金稱東懷國太祖不受使宗翰宗雄宗幹希尹商定冊文義指楊抄潤色胡十答阿撒高慶裔譯契丹字使贊謀與習泥烈偕行贊謀至遼見遼人再撰冊文復不盡如本國旨意欲見遼王自陳闡者止之贊謀不顧直入闡者相與搏搯折其信牌遼人懼遽遣贊謀歸太祖再遣贊謀如遼遼人前後十三遣

使和議終不可成太祖自將遂克臨潢其後伐宋思忠從宗翰軍封劉豫爲齊帝思忠爲傳宣使俄授謀克從宗弼克和尚原還爲同知西京留守事天眷初改蒲州防禦使元帥府在陝西有其官屬往往豪壓貧民爲奴起遣工匠千人東來至河上思忠留止其人以聞詔皆還之爲行臺尙書左丞是時贊謨爲行臺參知政事思忠黷貨無厭贊謨鄙之兩人由是交惡海陵殺左丞相秉德于行臺贊謨妻秉德乳母也思忠因構謨殺之是歲思忠入爲尙書右丞俄進平章政事封郟國公進拜左丞相兼侍中封沂國公大德三年致仕貞元二年十月海陵率三品以上官幸思忠第使以家禮見謂思忠曰卿神氣康實習先朝舊事舍卿無能知者當爲朕起共治國政對曰君之命臣敢不敬從但恨老病疎謬無以塞責耳遂命思忠乘馬從入宮拜太傅領三省事封齊國王尋拜太師兼勸農使已而罷中書門下省不置領三省事置尙書令位丞相上思忠爲尙書令特置散從八人聽隨至宮省奏賜坐海陵欲定封爵制度風思忠建白之封王者皆降封異姓或封公或一品二品階惟封思忠廣平郡王賜以玉帶

思忠言百官不當封妻海陵從之惟封思忠次室爲郡夫人而思忠亦自謂太祖舊臣頗自任雖海陵遂非拒諫而思忠盡言無所避海陵將伐宋問諸大臣皆不敢對思忠曰不可海陵不悅謂思忠曰汝勿論可否但云何時克之思忠曰以十年爲期海陵曰何久也朞月耳思忠曰太祖伐遼猶且數年今百姓愁怨師出無名江淮間暑熱湫濕不堪久居未能以歲月期也海陵怒顧視左右若欲取兵刃者思忠無所畏恐復曰老臣歷事四朝位至公相苟有補於國家死亦何憾有頃海陵曰自古帝王混一天下然後可爲正統爾耄夫固不知此汝子乙迭識書可往問之思忠曰臣昔見太祖取天下此時豈有文字耶臣年垂七十更事多矣彼乳臭子安足問哉海陵旣不用思忠言運四方甲仗于中都思忠曰州郡無兵何以備盜賊海陵盡籍丁壯爲兵思忠曰山後契丹諸部恐未可盡起皆不聽其後州郡盜起守令不能制契丹撒八斡窩果反期年乃克之當是時海陵伐宋祁宰諫而死張浩進言被杖思忠見疎孔彥舟畫策先取兩淮他無及者正隆六年思忠薨年七十三海陵深悼惜之親臨奠賻贈加

等賜金螭頭車使者監護給道路費大定十二年詔復烏林答贊謨官爵贈特進上謂宰臣曰贊謨忠實剛毅雖古人無以過與思忠有隙遂勸海陵殺之今思忠子孫皆不肖亦陰報也初思忠已構殺贊謨遂納其妻曹氏盡取其家財產章宗卽位贊謨女五十九乞改葬詔賜葬地于懷州并以思忠元取家貲付之

謙本名乙迭累官御史中丞世宗謂之曰省部官受請託有以室家傳達者官刑不肅士風頹敝如此其糾正之初世宗至中都多放宮人還家有稱心等數人在放遣之例所司失於檢照不得出宮心常怏怏大定二年閏二月癸巳夜遂於十六位放火延燒太和神龍殿上命近臣迹火之所發十六位宮人袁六娘等六人告實稱心等爲之稱心等伏誅賞賜袁六娘六人放出宮爲良謙意宮殿被火將復興工役勞民傷財乃上表乞權紓修建上使張汝弼詔謙曰朕思正隆比年徭役百姓瘡痍未復邊事未息豈遽有營繕也卿可悉之久之襲父思忠濟州猛安利涉軍節度副使烏林答鈔兀追捕逃軍至猛安中謙畏其

擾乃贖民財買銀賂鈔兀事覺鈔兀抵罪謙坐奪猛安遇赦求敘上曰乙迭無自與賊使復其所

釋盪温敦兀帶太師思忠姪也天會間充女直字學生學問通達觀書史工爲詩選爲尙書省令史除右司都事轉行臺右司郎中入爲左司員外郎累官同知大興尹京師盜賊止息事無留滯再遷刑部尙書改定海軍節度使除兵部尙書改吏部正隆伐宋爲武定軍都總管世宗卽位遣使召之授咸平尹爲北邊行軍都統改會寧尹都統如故是時初定窩斡人心未安兀帶爲治寬簡多備禦謹斥候邊郡以寧改北京留守以廉察舉兀帶所在有能名無私過由是入拜參知政事世宗諭之曰凡在卿上者行事或不當理咨稟不從卿以所見奏聞下位有可用之才當推薦之久之屬疾上命左宣徽使敬嗣暉往視遣醫治療薨年四十七上聞悼惜之賻銀千兩重綵四十端絹四百匹勅有司致祭久之上謂侍臣曰故參知政事兀帶刑部尙書彥忠滄州節度使兀不喝侍郎敵斡郎中骨赧皆爲人忠直後進中少有能及之者朕樂得忠直之人有如兀

帶輦者乎卿等爲朕舉之其見思如此

昂本名奔睹景祖弟字黑之孫斜幹之子幼時侍太祖太祖令數人兩兩角力時昂年十五太祖顧曰汝能此乎對曰有命敢不勉遂連仆六人太祖喜曰汝吾宗弟也自今勿遠左右居數日賜金牌令佩以侍年十七太祖伐遼謂之曰汝可擐甲從軍矣昂遂佩所賜金牌從軍太祖平燕策功賜甲第一區天輔六年宗翰駐北安州聞遼主延禧在鴛鴦灤遣耨盪温敦思忠請於國論勃極烈杲願以所部軍追之杲不能決乃遣昂與思忠詣宗翰議其事遂定天會二年南京叛軍帥闇母遣昂劉彥宗分兵討之宗望伐宋承制以爲河南諸路兵馬都統稱金牌郎君及攻汴州宗弼與昂以兵三千爲前鋒比暮昂先以兵千人馳至其北門時軍中遣使入城宋人不納昂諭之以事遂得入宗望至汴令闇母撻懶等屯于城之東北隅慮宋主遁去遣昂等率輕騎環城巡邏昂所領止入謀克遇敵萬人與戰敗之其步軍溺死於汴者過半七年大軍渡江敗宋兵於江上帥府遣昂等以兵追宋主宋主入會稽若爲堅守計有兵數千列陣於

郭東竹葦間諸將欲擊之昂曰此詐也不若急攻城不然將由他門逸去諸將猶豫未決而宋主果於他門以單舟入海不獲而還宗輔定陝西宗弼經略熙秦遣昂與撒离喝領兵八千攻取河西郡縣昂等遂取寧洮安隴二寨進至河州其通判率士民迎降攻樂州其都護及河州安撫使郭寧偕降復進取三寨至西寧州都護許居簡以城降吐蕃酋長之孫趙鈐轄率其所部木波首領五人來降昂別領軍四千往積石軍降其軍及所部五寨官吏追吐蕃鈐轄等十二人至廓州招之不下攻取之天眷元年授鎮國上將軍除東平尹明年夏宋將岳飛以兵十萬號稱百萬來攻東平東平有軍五千倉卒出禦之時桑柘方茂昂使多張旗幟於林間以爲疑兵自以精兵陳于前飛不敢動相持數日而退昂勒兵襲之至清口飛衆泛舟逆水而去時霖雨晝夜不止昂乃附水屯營夜將半忽促衆北行諸將諫曰軍士遠涉泥淖饑憊未食恐難遽行昂怒不應鳴鼓督之下令曰鼓聲絕而敢後者斬遂棄營去幾二十里而止是夜宋人來劫營無所得而去諸將入賀且問其故昂曰沿流而下者走也汧流而上者誘

我必追也今大雨泥淖彼舟行安我陸行勞士卒飢乏弓矢敗弱我軍居其下
流勢不便利其襲我必矣衆皆稱善岳飛以兵十萬圍邳州甚急城中兵纔千
餘守將懼遣人求救昂曰爲我語守將我嘗至下邳城中西南隅有塹深丈餘
可速實之守將如其教填之岳飛果自此穴地以入知有備遂止昂舉兵以爲
聲援飛乃退在東平七年改益都尹遷東北路招討使改崇義軍節度使遷會
寧牧天德初改安武軍節度使遷元帥右都監轉左監軍授上京路移里閔幹
魯渾河世襲猛安海陵曰汝有大功一猛安不足酬也益以四謀克昂受親管
謀克餘三謀克讓其族兄弟拜樞密副使轉太子少保進樞密使尙書左丞相
昂怒族弟妻去衣杖其脊海陵聞之杖昂五十久之拜太尉封瀋國公進太保
判大宗正事封楚國公累進封莒衛齊兼樞密使太保如故海陵南伐分諸路
軍爲三十二總管分隸左右領軍大都督府遂以昂爲左領軍大都督海陵築
臺于江上召昂及右領軍副大都督蒲盧渾謂之曰舟楫已具可以濟矣蒲盧
渾曰舟小不可濟海陵怒詔昂與蒲盧渾明日先濟昂懼欲亡去抵暮海陵遣

人止之曰前言一時之怒耳既而至揚州軍變海陵死世宗卽位遼陽昂使人殺皇太子光英于南京遣其子寢殿小底宗浩與其壻牌印祇候回海等奉表賀登寶位大軍北還昂恐宋人躡其後卽以罷兵移書于宋二年入見世宗深慰勞之進封漢國公拜都元帥太保如故置元帥府於山東經略邊事未幾奉遷睿宗皇帝梓宮於山陵以昂爲勅葬使事畢還山東三年召至京師以疾薨年六十四上爲輟朝親臨奠賻銀千兩重綵五十端絹五百匹昂在海陵時縱飲沉酣輒數日不醒海陵聞之常面戒不令飲得間輒飲如故太定初還自揚州妻子爲置酒私第未數行輒臥不飲其妻大氏海陵庶人從母姊也怪而問之昂曰吾本非嗜酒者但向時不以酒自晦則汝弟殺我久矣今遇遭明時正當自愛是以不飲聞者稱之睦於兄弟尤善施予其親族有貧困者必厚給之至於茵帳衣衾器皿僕馬之屬常預設於家卽命駕相就爲具歡樂終日盡以遺之卽日使富人或以子孫計爲言答曰人各有命但使其能自立爾何至爲子孫奴耶君子以爲達

贊曰撒离喝温敦思忠奔睹皆有功舊臣當天會皇統之際戰勝攻取可謂壯哉及海陵之世崎嶇嫌忌撒离喝既自以言致疑猶與大臭辨爭軍事何見幾之不早也烏林答贊謨廉直自奮思忠擠之於死自謂固結海陵堅若金石豈意執議不合而遽棄耶始之不以道未有能終者也且思忠之最可罪者構害贊謨又納其室而斂其貲此何異於殺越人于貨者乎陰報不在其身在其子孫亦已晚矣正隆之末奔睹位三公居上將內不肯與謀外不肯與戰逼側赴趙苟免自全大臣之道固若是乎

高楨遼陽渤海人五世祖牟翰仕遼官至太師楨少好學嘗業進士幹魯討高永昌已下瀋州永昌懼僞送款以緩師是時楨母在瀋州遂來降告以永昌降款非誠幹魯乃進攻既破永昌遂以楨同知東京留守事授猛安天會六年遷尚書左僕射判廣寧尹加太子太傅在鎮八年政令清肅吏畏而人安之十五年加太子太師提點河北西路錢帛事天眷初同簽會寧牧及熙宗幸燕兼同知留守封戴國公改同知燕京留守魏王道濟出守中京以楨爲同判俄改行

臺平章政事爲西京留守封任國公是時奚霫軍民皆南徙謀克別木者因之
嘯聚爲盜海陵患之卽以楨爲中京留守命乘驛之官責以平賊之期賊平封
河內郡王海陵至中京楨警夜嚴肅有近侍馮僧家奴李街喜等皆得幸海陵
嘗夜飲于禁楨杖之瀕死由是權貴皆震懼遷太子太保行御史大夫封莒王
策拜司空進封代王太子太保行御史大夫如故楨久在臺彈劾無所避每進
對必以區別流品進善退惡爲言當路者忌之薦張忠輔馬諷爲中丞二人皆
險詖深刻欲令以事中楨正隆例封冀國公楨因固辭曰臣爲衆小所嫉恐不
能免尙可受封爵耶海陵知其忠直慰而遣之及疾革書空獨語曰某事未決
某事未奏死有餘恨薨年六十九海陵悼惜之遣使致奠賻贈加等楨性方嚴
家居無聲伎之奉雖甚暑未嘗解衣緩帶對妻孥危坐終日不一談笑其簡默
如此

白彥敬本名遙設部羅火部族人初名彥恭避睿宗諱改焉祖屋僕根父阿斯
仕遼爲率府率彥敬善騎射起家爲吏補元帥府令史伐宋爲錢帛司都管勾

立三省選爲尙書省令史除都元帥府知事招諭諸部授以金牌行數千里有功超遷兵部郎中熙宗罷統軍司改招討司遣彥敬分僚屬收牌印諭諸部隸招討司還爲本部侍郎遷大理卿出爲通州防禦使改刑部侍郎怨家告誣開府慎思與西北路部族謀叛彥敬鞫得其實海陵嘉之遷簽書樞密院事以便宜措置邊防正隆六年調諸路兵伐宋及調民馬使彥敬主會寧蒲與胡里改三路事改吏部尙書充南征萬戶遷樞密副使契丹撒八反樞密使僕散忽土等以無功坐誅以彥敬爲北面行營都統與副統紇石烈志寧以便宜往賜御服皮襖行至北京聞南征諸軍逃歸者皆奔東京欲推戴世宗彥敬與志寧謀陰結會寧尹完顏蒲速賚利涉軍節度使獨吉義以圖之世宗已卽位使石抹移送移剌曷補等九人招彥敬志寧彥敬拒之使移送跪移送不屈皆殺之及完顏謀衍將兵攻北京彥敬使偏將率兵拒於建州之境而獨吉義先歸世宗蒲速賚稱疾不至世宗密遣人乘夜揭榜於北京市購以官賞彥敬志寧恐爲人圖已遂降以爲曷速館節度使不數月召爲御史大夫窩斡僭帝號諸軍馬

瘦弱遣彥敬往西北路招討司市馬得六千餘匹窩斡敗西走山後完顏思敬以新馬三千備追襲彥敬屯于夏國兩界間窩斡平召還爲兵部尙書出爲鳳翔尹改太原尹兼河北東路兵馬總管尋改河中尹大定九年卒于官

張景仁字壽甫遼西人累官翰林待制貞元二年與翟永固俱試禮部進士以尊祖配天爲賦題忤海陵旨語在永固傳大定二年僕散忠義伐宋景仁掌其文辭宋人議和朝廷已改奉表爲國書稱臣爲姪但不肯世稱姪國往復凡七書然後定其書皆景仁爲之世宗稱其能嘗曰今之文章如張景仁與宋人往復書指事達意辨而裁真能文之士也五年罷兵入爲翰林直學士七年遷侍講八年爲詳讀官宋國書中有寶鄰字景仁奏鄰字太涉平易上問累年國書有鄰字否命一一校勘六年書中亦有之上責問六年詳讀官劉仲淵右丞石琚亦請罪曰臣嘗預六年詳讀上曰此有司之過安得一一責宰臣邪詔有司就諭宋臣王淪使歸告其主後日國書不得復爾仲淵時爲禮部侍郎降石州刺史景仁遷翰林學士兼同修國史久之上召景仁讀陳言文字上問事款幾

何景仁率易少周密對曰二十餘事復曰其中如某事某事十事可行餘皆無謂也明日上召景仁責之曰卿昨言可行者朕觀之中復有不可行者卿謂無謂者中亦有可行者朕未嘗使卿分別可否卿輒專可否何也自今戒之十年兼太常卿學士同修國史如故轉承旨兼修國史改河南尹二十一年召爲御史大夫仍兼承旨修國史世宗謂景仁曰卿博學老儒求如古之御史大夫然後行之斯爲稱矣不能如古之人衆人不獨謂卿亦謂朕不能知人卿醉中頗輕脫失言當以酒爲戒初朝臣言景仁有文藝而頗率易不可任臺察景仁被詔就臺中治監察罪輒以便服視決罰上聞之責景仁曰朕初用卿爲大夫或言卿不可居此官今果不用故事率易如此卿自慎不然黜罰及矣景仁頓首謝未幾詔葬元妃李氏于海王莊平章政事烏古論元忠提控葬事都水監丞高杲壽治道路不如式元忠不奏決之四十景仁劾奏元忠輒斷六品官無人臣禮上曰卿劾奏甚當使左宣徽使蒲察鼎壽傳詔戒勅元忠曰監丞六品有罪聞奏今乃一切趨辦擅決六品官法當如是耶御史在尊朝廷汝當自咎勿

復再元忠尙豫國公主怙寵自任倨慢朝士景仁劾之朝廷肅然是歲薨
贊曰高楨以舊勞爲御史大夫剛明自任繩治無所避幾不免於怨憎之荼毒
直己而行自古難之白彥敬不受大定之詔而世宗賢之嚮使久在此位其深
謀讜論必有竦動人者張景仁儒者之勇廷論元忠正矣

金史卷八十四

金史卷八十五

元中書右丞宰相總裁脫脫等修

列傳第二十三

世宗諸子

永中 永蹈 永功子璿 永德 永成 永升

世宗昭德皇后生顯宗趙王執輦越王斜魯元妃張氏生鄜王允中越王允功元妃李氏生鄭王允蹈衛紹王允濟潞王允德昭儀梁氏生豫王允成才人石抹氏生夔王允升執輦斜魯皆早卒

鎬王永中本名實魯刺又名萬僧大定元年封許王五年判大興尹七年進封越王十一年進封趙王十三年拜樞密使十九年子石古乃加光祿大夫是歲改葬明德皇后于坤厚陵永中母元妃張氏陪葬十一月庚申自警寧宮發引永中以元妃柩先發使執黃繖者前導俄頃皇后柩出警寧宮顯宗徒跣少府

監張僅言呼執黃繖者不應既葬僅言欲奏其事顯宗解之曰是何足校哉或

織人誤耳僅言乃止二十一年改判太宗正事永中不悅顯宗勸之曰宗正之職自親及疎自近及遠此親賢之任也且皇子之貴豈以官職閑劇爲計邪永中乃喜二十四年世宗幸上京顯宗居守并留永中顯宗先遣章宗宣宗奉表問起居于上京旣而遣永中子光祿大夫石古乃奉表世宗喜謂豫國公主曰皇太子孝德天成先遣二子繼遣此子兄弟之際相友愛如此也二十五年六月世宗在天平山好水川清暑顯宗薨于中都詔曹王永功視章宗召永中赴行在是歲與章宗及永功等並加開府儀同三司二十六年復爲樞密使是歲世宗賜諸孫名石古乃曰瑜神土門曰璋阿思邁曰玘阿离合邁曰瑒二十七

年玘年十五以上加奉國上將軍章宗卽位起復判西京留守進封漢王與諸弟各賜金五百兩銀五千兩錢二千貫重幣三百端絹二千匹再賜永中修公廨錢三百萬特加石古乃銀青榮祿大夫阿离合邁奉國上將軍明昌二年正月辛酉孝懿皇后崩判真定府事吳王永成判定武軍節度使隋王永升奔喪後期各罰俸一月杖其長史五十永中適有寒疾不能至上怒頗意諸王有輕

慢心遣使責永中曰已近公除亦不須來二月丙戌禫祭永中始至入臨辛卯始克行燒飯禮壬辰永中及諸王朝辭賜遺留物禮遇雖在而嫌忌自此始矣四月進封并王三年判平陽府事進封鎬王初置王傅府尉官各爲官屬實檢制之也府尉希望風旨過爲苛細永中自以世宗長子且老矣動有掣制情思不堪殊鬱鬱乃表乞閑居詔不許四年鄭王永蹈以謀逆誅增置諸王司馬一員檢察門戶出入毬獵游宴皆有制限家人出入皆有禁防河東提刑判官把里海坐私謁永中杖一百解職前近侍局副使裴滿可孫嘗受永中請託爲石古乃求除官可孫已改同知西京留守猶坐免故尙書右丞張汝弼永中母舅也汝弼妻高陀幹自大定間畫永中母像奉之甚謹挾左道爲永中求福希覬非望明昌五年高陀幹坐詛祝誅上疑事在永中未有以發也會鎬王傅尉奏永中第四子阿离合邁因防禁嚴密語涉不道詔同簽大陸親府事臺御史中丞孫卽康鞫問并求得第二子神徒門所撰詞曲有不遜語家奴德哥首永中嘗與侍妾瑞雪言我得天下子爲大王以爾爲妃詔遣官覆按狀同再遣禮部

尚書張曄兵部侍郎烏古論慶裔覆之上謂宰臣曰鎬王祗以語言得罪與永蹈罪異參知政事馬琪曰永中與永蹈罪狀雖異人臣無將則一也上曰大王何故輒出此言左丞相清臣曰素有妄想之心也詔以永中罪狀宣示百官雜議五品以下附奏四品以上入對便殿皆曰請論如律惟宮籍監丞盧利用乞貸其死詔賜永中死神徒門阿离合懣等皆棄市勅有司用國公禮收葬永中平陽府監護官給葬具妻子威州安置泰和七年詔復永中王爵賜諡曰厲勅石古乃於威州擇地以禮改葬歲時祭奠貞祐二年詔徙永中妻子石古乃等鄭州安置貞祐三年太康縣人劉全嘗爲盜亡入衛真界詭稱愛王所謂愛王指石古乃石古乃實未嘗有王封小人妄以此目之劉全欲爲亂因假託以惑衆誘王氏女爲妻且言其子方聚兵河北東平人李寧居嵩山有妖術全同縣人時温稱寧可論大事乃使范元書僞號召之寧至推爲國師議僭立事覺全温寧皆伏誅貞祐四年潼關破徙永中子孫于南京興定二年亳州譙縣人孫學究私造妖言云愛王終當奮發今匿跡民間自號劉二衛真百姓王深等皆

信以爲誠然有劉二者出而當之遣歐榮輩結構逆黨市兵仗大署旌旗謀僭立事覺誅死者五十二人緣坐者六十餘人永中子孫禁錮自明昌至于正大末幾四十年天興初詔弛禁錮未幾南京亦不守云

鄭王永蹈本名銀尤可初名石狗兒大定十一年封滕王未期月進封徐王二十五年加開府儀同三司二十六年爲大興尹章宗卽位判彰德軍節度使進封衛王明昌二年徙封鄭王三年改判定武軍初崔溫郭諫馬太初與永蹈家奴畢慶壽私說讖記災祥畢慶壽以告永蹈郭諫頗能相人永蹈乃召郭諫相己及妻子諫說永蹈曰大王相貌非常王妃及二子皆大貴又曰大王元妃長子不與諸王比也永蹈召崔溫馬太初論讖記天象崔溫曰丑年有兵災屬兔命者來年春當收兵得位郭諫曰昨見赤氣犯紫微白虹貫月皆主丑後寅前兵戈僭亂事永蹈深信其說乃陰結內侍鄭兩兒伺上起居以崔溫爲謀主郭諫馬太初往來游說河南統軍使僕散揆尙永蹈妹韓國公主永蹈謀取河南軍以爲助與妹澤國公主長樂謀使駙馬都尉蒲刺覩致書于揆且先請婚以

觀其意揆拒不許結婚使者不敢復言不軌事永蹈家奴董壽諫永蹈不聽董壽以語同輩奴千家奴上變是時永蹈在京師詔平章政事完顏守貞參知政事胥持國戶部尙書楊伯通知大興府事尼龐古鑑鞫問連引甚衆久不能決上怒召守貞等問狀右丞相夾谷清臣奏曰專貴速絕以安人心於是賜永蹈及妃卞玉二子按春阿辛公主長樂自盡蒲刺覩崔温郭諫馬太初等皆伏誅僕散揆雖不聞問猶坐除名董壽免死隸監籍千家奴賞錢二千貫特遷五官雜班敘使自是諸王制限防禁密矣泰和七年詔復王封備禮改葬賜諡曰刺以衛王永濟子按辰爲永蹈後奉其祭祀

越王永功本名宋葛又名廣孫貞元二年生沉默寡言笑勇健絕人涉書史好法書名畫大定四年封鄭王七年進封隋王十一年進封曹王十五年除刑部尙書上曰侍郎張汝霖汝外舅行也可學爲政十七年授活活土世襲猛安十八年改大興尹世宗幸金蓮川始出中都親軍二蒼頭縱馬食民田詔永功蒼頭各杖一百彈壓百戶二人失覺察勒停上次望京淀永功奏曰親軍人止一

蒼頭兩彈壓服勤爲日久矣臣昧死違詔量決蒼頭使彈壓待罪可使償其田直惟陛下憐察上皆從之老嫗與男婦憩道傍婦與所私相從亡去或告嫗曰向見年少婦人自水邊小徑去矣嫗告伍長蹤跡之有男子私殺牛手持血刃望見伍長意其捕己卽走避之嫗與伍長疑是殺其婦也捕送縣不勝楚毒遂誣服問尸安在詭曰棄之水中矣求之中水果獲一尸已半腐縣吏以爲是男子真殺若婦矣卽具獄上永功疑之曰婦死幾何日而尸遽半腐哉頃之嫗得其婦於所私者永功曰是男子偶以殺人就獄其拷掠足以稱殺牛之科矣遂釋之而去武清黃氏望雲王氏豪猾不逞永功發其罪畿內肅然二十三年判東京留守是月改河間尹閱月改北京留守居無何上謂宰臣曰朕聞永功到北京爲政無良雖朕子萬一敗露法可廢乎朕已戒勅永功卿等可諭其長史俾匡正之到北京凡七月改東京留守世宗幸上京過東京永功從明年上還至天平山好水川皇太子薨詔永功護喪事尋拜御史大夫章宗封原王加開府儀同三司趙王永中及永功兄弟皆加開府儀同三司明年判大宗正事應

州僧與永功有舊將訴事于彰國軍節度使移刺胡刺求永功手書與胡刺爲地胡刺得書奏之上謂宰臣曰永功以書囑事胡刺此雖細微不可不懲也凡人小過不治遂至大咎有犯必懲庶幾能改是亦教也皆曰陛下用法無私臣下敢不敬畏於是永功解職未幾復判大宗正事章宗卽位除判平陽府事進封冀王永功之官隨引醫人沈思存過制限當解職上曰朕知此事當痛斷監奴及治府掾長史管轄府事者罪仍著于令家奴王唐犯罪至徒永功曲庇之平陽治中高德裔失覺察笞四十於是永功改判濟南府詔永功曰所坐雖細事法令不得不如此今已釋矣後毋復然濟南先帝舊治風土甚好可悉此意也改授山東西路把魯古世襲猛安二年判廣寧府事進封魯王明年判彰德府事承安元年進封郢王明年判太原府事泰和七年改西京留守八年復判平陽府事大安元年進封譙王判中山府事明年進封越王宣宗卽位免常參明年從遷汴京久之詔永功每月朔一朝與定四年詔永功無朝五年有疾賜御藥疾革賜尙醫診視一日五遣使候問是歲薨上哭之慟諡曰忠簡子福孫

壽孫粘沒曷大定二十六年詔賜福孫名璐壽孫名璿粘沒曷名琳是年璐加奉國上將軍章宗卽位加銀青榮祿大夫封蕭國公初爲興陵崇妃養子常居京師奉朝請泰和五年卒章宗輟朝百官進名奉慰

璿本名壽孫世宗賜名字仲實一字子瑜資質簡重博學有俊才喜爲詩工真草書大定二十七年加奉國上將軍明昌初加銀青榮祿大夫衛紹王時加開府儀同三司貞祐中封胙國公正大初進封密國公璿奉朝請四十年日以講誦吟詠爲事時時潛與士大夫唱酬然不敢明白往來永功薨後稍得出游與文士趙秉文楊雲翼雷淵元好問李汾王飛伯輩交善初宣宗南遷諸王宗室顛沛奔走璿乃盡載其家法書名畫一帙不遺居汴中家人口多俸人少客至貧不能具酒肴蔬飯共食焚香煮茗盡出藏書談大定明昌以來故事終日不聽客去樂而不厭也天興初璿已臥疾論及時事嘆曰兵勢如此不能支止可以降全完顏氏一族歸吾國中使女直不滅則善矣餘何復望是時曹王出質璿見哀宗於隆德殿上問叔父欲何言璿奏曰聞訛可欲出議和訛可年幼不

苦諳練恐不能辦大事臣請副之或代其行上慰之曰南渡後國家比承平時有何奉養然叔父亦未嘗沾漑無事則置之冷地無所顧藉緩急則置于不測叔父盡忠固可天下其謂朕何叔父休矣於是君臣相顧泣下未幾以疾薨年六十一平生詩文甚多自刪其詩存三百首樂府一百首號如菴小藁第五子守禧字慶之風神秀徹璫特鍾愛嘗曰平日所蓄書畫將以付斯子及汴城降守禧病卒年未三十

潞王永德本名訛出大定二十五年與章宗及諸兄俱加開府儀同三司二十七年封薛王明年除祕書監二十九年進判祕書監進封瀋王明昌元年授山東東路把魯古必剌猛安三年進封豳王五年遷勸農使承安二年進封潞王承安三年再任勸農使泰和元年有司劾永德元日進酒後期有詔勿問衛紹王時累遷太子太師宣宗卽位改同判大陸親府事興定五年遷判大陸親府事子翰論賜名琰

豫王永成本名鶴野又曰婁室母昭儀梁氏永成風姿奇偉博學善屬文世宗

尤愛重之大定七年始封瀋王以太學博士王彥潛爲府文學永成師事之十一年進封幽十五年就外第十六年判祕書監明年授世襲山東東路把魯古猛安判大睦親府事旣而改中都路胡土靉哥蠻猛安二十年改授翰林學士承旨二十三年判定武軍節度使事尋改判廣寧府二十五年世宗幸上京命留守中都判吏部尙書進開府儀同三司爲御史大夫章宗卽位起復進封吳判真定府事明昌元年改山東西路益買必剌猛安明年進封克坐率軍民圍獵解職奉表謝罪上賜手詔曰卿親實肺腑夙著忠純侍顯考於春宮曲盡友于之愛洎冲人之繼統愈明忠赤之心艱難之中多所裨益朕心簡在毫楮莫窮用是起之苦塊之中授以維城之任自典藩服歲月荐更叢爾趙邦知驥足之難展眇哉鎮府固牛刀之莫施方思驛召以赴朝何意遽罹於國憲偶因時獵頗擾部民法所不寬憲臺聞上朕尙含容累月未忍卽行雖欲遂於私恩竟莫違於公議解卿前職卽乃世封噫祖宗立法非一人之敢私骨肉至親豈千里而能間以此退閑之小誠欲成終始之鴻恩經云在上不驕高而不危是以

知節慎者修身之本驕矜者敗德之源朕每自勵今以戒卿昔東平樂善能成不朽之名梁孝奢淫卒致憂疑之悔前人所行可爲龜鑑卿兼資文武多藝多才履道而行何施不可如能德業日新無慮牽復之晚朕素不工詞翰臨文章草直寫所懷冀不以辭害意也未幾授沁南軍節度使三年改判咸平府事未赴移判太原府事上以永成誕日親爲詩以賜有美譽自應輝玉牒忠誠不待啓金縢之語當世榮之七年改判平陽府事承安改元以覃恩進封豫明年冬進馬八十匹以資守禦之備上賜詔獎諭曰卿夙有雋望時惟茂親通達古今砥礪忠義方分憂於外服來輸駿於上閑欲助邊防以增武備惟盡心於體國乃因物以見誠載念懇勤良深嘉獎五年再任俄召還以疾不能入見上親幸其第臨視泰和四年薨訃聞上爲之震悼賻贈甚厚諡曰忠獻永成自幼喜讀書晚年所學益醇每暇日引文士相與切磋接之以禮未嘗見驕色自號曰樂善居士有文集行于世云

夔王允升改名永升本名斜不出一名鶴壽大定十一年封徐王進封虞王二

十六年加開府儀同三司明年判吏部尚書授山東西路按必出虎必刺猛安章宗卽位加恩宗室徙封隋王除定武軍節度使明昌二年改封曹王久之改封宛王衛紹王卽位徙今封貞祐元年九月宣宗以允升年高素羸疾詔宮中聽扶杖尋薨旣殯燒飯上親臨奠

贊曰世宗保全宗室無所不至雖矯海陵之失亦由天資仁厚而然也其子承中承蹈皆死章宗之手其理蓋有不可詰者章宗無後則厥報不爽矣

金史卷八十五